

ASO LULU, 14 IUNI 2023

Na nofoia e le Fofoga Fetalai le Nofoa i le itula e 9:28 i le taeao.

Tatalo.

FOFOGA FETALAI: Ou te fasilasila atu ua amatalia nei Tualumaga a le Fono Aoaofa Faitulafono.

ISI FAASILASILAGA A LE FOFOGA FETALAI

FOFOGA FETALAI: Ou te faatalofa atu i leni taeao fou i le paia o le Palemene ua tatou tauaofia aua lava le faaauauina o le tatou galuega e pei ona sa tolopo mai i le aso ananafi. O le taulaga o le faaneene ma le loto faafetai tatou te sii pea i le Atua ona o Lana tausiga alofa ua mafai ai ona tatou toe fesilafai i le manuia.

E ofo alofa ma faatalofa atu i le paia o le tatou Maota i le afio o lau Afioa i le Tamaitai Palemia faapea le Sui Palemia ma le saofaiga mamalu a le Pulega Faatonu. Afio le Taitai o le Itu Agai faapea foi sui usufono mamalu uma o le Palemene.

Le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo ae faapea foi nisi o le mamalu o le atunuu ua faatasi mai e molimauina le tatou tualumaga i leni taeao. Malo le soifua manuia. E i ai foi le talitonuga o lo o agalelei pea le Atua i le tapuaiga a le atunuu e afua mai ona ao seia oo i a tatou fanau iti. E faatalofa atu le tatou Palemene. Ia to mai le lagi manuia aua le alofaiva o le tatou Maota i leni aso. Ae faapea foi le tapuai ai faafofoga mai a si o tatou atunuu, ia manuia le usugafono i leni taeao.

TUUNA ATU O PEPA

Na tolaulauina e le Failautusi i le Fono Aoaofa le faasologa o Pepa e tusa ai ma T.T.49(2).

1. P.P.2023/2024 Nu.31, Tali a le Malo i le P.P.2022/2023 Nu.118, Lipoti a le Komiti o le Vaega o Atinae Eseeese i le P.P.2020/2021 Nu.138 & P.P.2021/2022 Nu.32, Lipoti Faaletausaga a le

Matagaluega o Fesootaiga ma Faamatalaga Tekonolosi mo Tausaga Faaletupe 2019/2020 & 2020/2021.

2. P.P.2023/2024 Nu.32, Tali a le Malo i le P.P.2022/2023 Nu.125, Lipoti a le Komiti o le Vaega o Atinae Eseeese i le P.P.2021/2022 Nu.51, Lipoti Faaletausaga a le Pulega o le Suavai a Samoa mo le Tausaga Faaletupe 2020/2021.

Ma le faaaloalo lau Afioga.

**TULAFONO TAU FAAOFI O TEUTEUGA ESEESE I TULAFONO
(PULEGA AUTU O LAISENE) 2023 – felafolafoaiga faaauau i
luga o le faitauga faalua – Aso 2**

FOFOGA FETALAI: E tolopo felafolafoaiga a le Fono Aoaofaitulafono i le aso Fono ananafi, ua maea ona saunoa le sui usufono mo Sagaga Nu.2.

Ia o le avanoa lea i lenei mo se tasi o le Maota e fia saunoa i le tatou Tulafono Tau Faaofi.

Ia, o lea ua matau atu pei ua faamalieina finagalo o le tatou Maota. Ia, se i tulai mai le sui usufono mo Faleata 4 le Igoamatua lau Fetalaiga Ale.

Tofa ALE VENA ALE (Faleata 4): Faafetai i lau Afioga i le Fofoga Fetalai ua maua se avanoa o lenei usugafono e folasia ai i lumamea o le Palemene i lenei taeao, o se tuualalo foi e tusa ai ma le tatou Tulafono ua i lumamea nei o le Maota.

Lau Afioga i le Fofoga Fetalai, tatou folau ia i lou sa i lenei taeao, o lea ua e tatala le lagi, ua faafofoga le Atua i le taulaga ua e molia i lenei taeao, ma ua tatou tatalo faatasi foi le Palemene ina ia alofagia e le Atua tatou galuega fai i lenei aso. O lea foi ua e paepaeulufanua paia o le taeao ma le aso aua le tapuaiga a lo tatou atunuu, e faapea foi paia faale-Malo, e faapea foi paia faale-Talalelei aua le Atua ma Lona finagalo i auauna tofofi a le Atua ma Ekalesia Kerisiano uma i le tatou atunuu o lo o tapuaia o tatou faiva. O lea foi e faatasi mai Ofisa Sili o Pulega o Matagaluega i le latou tautua matavela foi aua le fautuaina foi o Afioga i Minisita ma le Faigamalo aua le agai i luma o le tatou Malo ma ona upufai.

Ae ua ou tulai atu lau Afioga ma le faaaloalo tele e fia faaalua se manatu e tusa ai o le tatou Tulafono. O tatou lava ia o faipule, na tatou omai iinei e fausia Tulafono, o le tatou matafaioi lea, we are the law makers, tatou te silasila lelei i Tulafono ina ia limataitaiina ai le tatou Malo ma ia manuia ai le tatou atunuu, ia soifua filemu ma soifua saoloto o tatou tagata, aemaise fanau lalovaoa a Samoa. O le matafaioi lena a tatou. Lau Afioga i le Fofoga Fetalai, o le Tulafono ua i lumamea nei o le Maota, ia, sa i ai muamua foi le laiseneina ma le pasiaina o taavale i o i le LTA, peitai o se finagalo foi o le

faigamalo foi ua tuanai atu nei, ia lea na toe faasee mai ai foi i le Ofisa o Leoleo. Ia lea foi ua toe finagalo le faigamalo ua tulai mai nei o le mea tatau lea ona toe faasee atu le laiseneina o taavaleafi i o i le LTA. E ui lava la ona o la e ua leva ona fai le galuega a le Matagaluega a o lea faatoa fai le Tulafono, ia o mea lava e faapena ona fai, e pule lava tatou ia i le faiga o tatou mea. Lau Afioga i le Fofoga Fetalai, e matua lagolagoina.

Tofa Hon Olo Fiti Afoa Vaai (Minisita mo Galuega, Felauaiga ma Atinae Esee): Lau Afioga i le Fofoga Fetalai na o se mea lava lea e fia faasao lau Afioga.

FOFOGA FETALAI: Ia, malie le sui usufono mamalu se i tulai mai le Afioga i le Minisita o Galuega Tetele.

Tofa Hon Olo Fiti Afoa Vaai: Ona o lea ua saunoa le sui usufono mamalu o la e foi e faafogafoga le atunuu faapea ai ua i ai ni tulaga faapea o le fai muamua ae faatoa fai Tulafono. I lalo lava ia o le Tulafono a Leoleo, o lo o manino ai le malosiaga o le Komesina o Leoleo e na te tuu mai ai ia ituaiga galuega faapea i o latou tiute i se isi lava vaega po o le LTA po o i i Tina ma Tamaitai. O lo o manino ai le vaega lena o le Tulafono lea la e faatino ai le taimi lenei e talitali ai le pasiaina o le tatou Tulafono lea ona faatino ai lea o mea uma lava lau Afioga i le sui usufono mamalu.

FOFOGA FETALAI: Malo faafetai. Masalo o lena ua maua mai e lau Afioga i le sui usufono mamalu.

Tofa ALE VENA ALE: Ia, manaia tele lava lau Afioga i le Minisita. Ae o le sao tonu lava lena o le mea, a i ai se mea e fesiligia faamalamalama, ioe. Ia o lea la ua ou malamalama atu. O lona uiga la, o la e lelei mea uma, faafetai i lau Afioga i le Minisita. Ae pei ua vavevave foi se tala a le tamaloa Faleata, a o la e sagatonu lava le tulaga foi o le faatinoga o auunaga a le Matagaluega.

Lau Afioga i le Fofoga Fetalai, tele lava saunoaga foi i le aso ananafi i le Tulafono i le tele o taavale ma tulaga foi faapena. O le itu lea ou te fia tuu atu ai se tuualalo i lau Afioga i le Minisita ma le Matagaluega, e le tatau lava ona toe laiseneina se taavale without insurance. E tatau ona i ai ni insure uma lava, insure uma lava taavale. A e silasila i ai i le mea lea e tupu i le taimi lenei, o la e lava e i ai taavale, ua mautinoa lava taavale fou ia e insure, leaga e tele mataupu ia ua lavevea taavale ma settle lea i tua, e fiu le tagata lea ua lavea le taavale e tuli lea na... e tatau lava.

Lau Afioga i le Minisita, o lau fautuaga, e le fai ai pe a faapea e le i ai lou finagalo. A o lou lava ia manatu so o se taavale lava e fealuai i luga o le aualatele, it should be insured, e tatau ona fai ina ia mafai aua e tele mau

ituaiga insure, full cover, e mafai ona fai ai ma le taavale a le tagata la ua lavea fai ai ma lau taavale, ia po o le ituaiga faiga foi lele lea e fai ai e isi Malo o le lalolagi mea e tau o le no fault insurance, na o lau oe lava ia taavale ma le isi taavale e afaina ai. A o le Tulafono ia lau Afioga i le Fofoga Fetalai, ua matua talia ma le fiafia e lenei itumalo. E tele manaoga o lou itumalo ae o le a le faia atua i le taimi lenei se i oo i le tatou Tala o le Tupe. E matua tele ma anoanoai.

Ae momoli atu le agaga faafetai i lau Afioga i le Minisita e tusa ai ma le Tulafono ma ua talia ma le faafetai e lenei itumalo. Faafetai. Manuia le tatou Fono. Soifua manuia Samoa ma lana tapuaiga, faafetai.

FOFOGA FETALAI: Malo faafetai. Malo lava mo le faasoa aemaise foi o nai fautuaga. Ia, tulai mai lau Afioga i le sui usufono mamalu mai Siumu.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai mo le avanoa. Ia, e viia pea le agalelei o le Atua e pei ona e sii le tatou viiga ma le faafetai i lenei taeao i Lona agaalofa ma Lona agalelei ua feiloai ai le Palemene nei i le manuia ma le fiafia. Viia pea Lona agalelei.

E faatalofa atu ai la i le paia maualuga o le Maota i le afio o lau Afioga i le Fofoga Fetalai, afio lau Afioga i le Tamaitai Palemia, afio lau Afioga i le Sui Palemia afifio Afioga i Minisita o le Kapeneta ma Afioga i Minisita Lagolago, ae faapena foi i lea Itu o le Maota i le afio mai o le Afioga i le Taitai o le Itu e Agaia le Malo ma le paia maualuga i sui usufono mamalu o le Palemene, aemaise foi o le paia maualuga i Ofisa Sili o Pulega o Matagaluga ma le mamalu o Samoa ua mafai oan tatou auai i lenei foi taeao.

Sa leai se manatu e fai se lauga, ae ua lava au tama ia e faia le matou galuega, ae peitai o lea foi ua faitioina au faapea ua ou fia taitai tele, a o lea la ua ou tulai atu ai e fai sina faamatalaga puupuu lava i le Tulafono e pei ona ua i lumamea nei o le Palemene.

Ia, lau Afioga i le Fofoga Fetalai ma le paia o le Palemene. O lenei lava Tulafono e pei ona faataotoina mai ua teuteuina ma ua aiaia ai mo le toe faasee atu o le galuega tauave a le Pulega autu o Laisene i le Pulega o Felauaiga i le Laueleele, le vaega lava lea o Laisene o Taavale, ma e matua lagolagoina lava e lenei usugafono lenei foi Teuteuga e pei ona tuuina mai. Ia atonu o lea ua taoto lava i lagatonu le toe tulai mai ina ia le toe tulai mai ai ni feteenaiga i auaunaga. O le mafuaaga lea e pei ona ua faatulai mai le LTA ona tuuina atu lea i ai o le vaega lenei. Ia, ae na tulai mai ai feteenaiga, o lea la na faasee ai i le Ofisa o Leoleo e pei ona silafia, o lea la ua i ai le finagalo o le Faigamalo e toe faasee atu i le LTA, ia atonu o lea ua taoto lava i lagatonu.

Ae faafetai lava i lau Afioga, e ui lava ina e le o se Tulafono tele, ae o lea ua faafofoga lau Afioga ma le mamalu o le Palemene i finagalo faaalua o sui

usufono mamalu o le Palemene lenei i faafitauli aemaise foi o ni fautuaga ona o aafiaga lava o nei mea o taavale. Ma ou te matua ioe ma faamoi i le tele o faitioga e pei ona saunua i ai sui usufono o le Palemene. Ae pei lava ona tatou i ai, ua tatou tapisa lava ona ua tele naua taavale i totonu o le atunuu, o lea ua mafua ai ona tatou aafia ai i le tele o poloka i luga o auala i taimi lava o lo o faapena ona fegasoloai ai le mamalu o le atunuu.

A tatou toe tepa lava agai i tua a o le i suia le itu auala e pei ona i ai nei, pei na o le lua lava pe tolu kamupani sa latou okaina taavale, o le tele lava o taavale nei lea sa tutu i le itu tauagavale foeli. Pei lava na o Amerika. Ia ae maunua lava sa na o i latou e lava le tamaoaiga, ia, e faapena foi le mamalu o le atunuu sa i ai aiga i Amerika ma Amerika Samoa foi sa faapena ona faimeaalofa mai ai o tatou aiga. Sa leai la se faafitauli i lea vaitaimi ona sa faaletele ni taavale. Ae peitai ina ua finagalo le faigamalo sa i ai i lea vaitaimi le faigamalo sa matou i ai i le matou foi vaitaimi, ua finagalo e suia le itu auala o tatou taavale e pei ona i ai nei, ona matala loa lea o faitotoa mo le faauluina mai o taavale mai Niu Sila ma Ausetalia. Ona o au la sa ou Minisita ai i le Matagaluega o Tiute ma Tupe Maua i lea vaitaimi, ia sa matauina lava le matua malosi o le auina mai o taavale mai o tatou aiga i Niu Sila ma Ausetalia, ona o le agalelei mai o tatou aiga i aiga i Samoa nei. Sa faatau le taavale i tupe a latou i Niu Sila ma Ausetalia, totogi le freight, taunuu mai le taavale i Samoa, ia aumai ai foi ma le seleni e fesoasoani i le totogiina o le tiute. Sa i ai foi la le faafitauli e i ai taavale ua taunuu mai, ia atonu lava na pau le malosi ua o o i ai nai aiga ua faatau taavale ma momoli mai i Samoa ae ua le lava foi le seleni e totogi ai le tiute. E i ai la le malosiaga o le Minisita o Tiute e fai ai se fesoasoani ia i latou ia e tausaili se seleni. O le fesoasoani la sa mafai ona fai i ai afai e maua mai le afa o le tiute, ia o le tiute lava sa aumai ai taavale i lenei taimi, o le maualuga lava o le \$3,000 i le \$4,000. A mafai la ona maua mai e nai aiga le afa, ia sa faamatuu atu i ai le taavale, ae 3 masina e tau togitogi mai ai le paleni. Ia e masalo lava sa manaia lava ma matagofie foi le faagasologa mai sa le tele lava ni taavale, ma o taavale foi nei sa saili mai e aiga sa matua lelei lava. Sa latou saili lelei foi ma tulaga o i ai mea o spare parts. Sa latou saili lelei foi i taavale e aumai aua le manuia o aiga. Peitai la o lea ua tele kamupani lea ua latou aumaia taavale nei second hand, e talitonu o taavale nei pei ua out of date i atunuu ia ua faatau i ni tau pau, ona faatau lea ma faamatagofie ona aumai ai lea i nei. E pei o i la lea e tulai mai ai foi nisi o finagalo e tausaili lelei ma vaavaai lelei taavale nei po o talafeagai, leaga o lea e vaavaai i ai foi lele, aemaise lava o le auala kolosi lea e aluatu i Tanugamanono e tau i Siumu, ta te vaavaia lava i le tele o taimi ta te alu atu lava ua susue mai le afa o le taavale, ia po o le faatamala lava o le avetaavale i le le siakia o le vai ma le suauu i le taeao i aso uma. O lenei e tulai mai ai tulaga faapea, ae a le masalo lava o taavale e aumai e le o lelei ona siaki lelei taavale. Ia, e pei o le mafuaaga lenei o le tulai mai i lenei taimi, lea ua tatou tausaili i auala e tau taofiofia ai le aumaia o taavale i

totonu. Lea e i ai foi finagalo o nisi e taofi le toe aumaia o taavale i se tausaga, ae toe vaavaai foi i ni auala e fai ai nisi auala e oo mai i totonu o le taulaga ina ia taofia ai le poloka lenei tatou te aafia ai i le taimi o le malaga mai i le taeao i galuega ma aoga aemaise foi o le taimi e manava ai.

Ia, e i ai lava le tele o manatu, ae lafo atu pea i le Afioga i le Minisita i Matagaluega e lua i ni auala e faafaigofie ai. Ae i ai foi le finagalo sa faaalua e le Afioga i le Minisita o Galuega Tetele e faapea e le o se tiute lea o le LTA le faasinoina o paka o taavale. Ia atonu lava e sao, ae ua maitauina ai le foliga mai e le o lava le aufaigaluega, e le o lava le aufaigaluega o Matagaluega e lua. Ona i ai lea o le manatu, e a pe a tefa au ae aumai se teuteuga e deputize uma ai lava Minisita Lagolago e mafai ai ona latou fesoasoani i galuega ia. Aua a tatou tau mai nei i le auala i le taimi lea e pe ai le power, ua ta fia oso lava i fafo e faasino taavale, ae leaga la e faitioina ai ita faapea o lota aia i mea e le tatau ona aia i ai. Ae a deputize la Minisita Lagolago, tau atu lava i so o se mea lea tatou te manaomia e fia fai, a o lea ua i ai le power. Se ta te fia otegiaina foi avepasi ma avetaavale nei, se e sau lava tu i le pioga, o le tele ia o faafitauli. O le isi mea ta te vaai atu, e tipi tolu tipi fa mai taavale, ona ota tu lava lea se i faasao lota ola ae se i afio ese lana afioga. Ta te fia alu la e tuli ma otegia, a o le mea lena e oo i ai e otegia ai ma ita. Ae a alu atu la le Minisita Lagolago, sei lana badge foi lele, faatonutonu loa avetaavale nei, e fesoasoani i le tele o faafitauli ia ma le lava o alii leoleo ia ma le aufaigaluega foi a le LTA. Ia pei o nai manatu na lau Afioga.

Ae o le isi mea, e tatau ona faataua e le Palemene lenei le fai o laisene. O lea lava e afifio atu a outou afioga, o la e poloka lava. E poloka tatou e leoleo ma siaki tatou laisene po o fai ni tatou laisene. O lea foi la ou te fai ia Ale po o fai sona laisene. Lau Afioga i le Fofoga Fetalai ma le mamalu o le Palemene, se i siaki muamua lava tatou po o i ai ni tatou laisene lau Afioga. O le ala lea ae a faapea e silafia e le Ofisa o Leoleo, leai o le Palemene ua uma ona fai latou laisene, e le toe taofia la ita i le auala. Aua ta te pasi atu taofi, pasi mai taofi. Ia, e pei o nai manatu na lau Afioga i le Fofoga Fetalai, e taua lava le faatino muamua ia i tatou ua taua o Taitai o le atunuu ae otegia tatou e leoleo fai mai ua leai se laisene, aua o lea lava e pepelo fai mai ua galo, ua galo a o lea la ou te le o iloa i la'u tama o Ale po ua fai sona laisene. Ia ae o nai manatu na lau Afioga i le Fofoga Fetalai..

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau Afioga i le Fofoga Fetalai o se mea e fia faamalamalama.

FOFOGA FETALAI: Ia, malie lau Afioga i le sui usufono mamalu mai Siumu, ua malie foi le saunoaga ae... i le faauilavea a le Afioga i le Minisita o Faatoaga ma Faiga Faiva. Ia lau Afioga i le Minisita.

Susuga Hon Laauli Leuatea Polataivao Fosi: E faatalofa atu i le mamalu o le Palemene i lenei taeao. Sa nofonofa lava faavaa o savili le mea ua oo i ai le saunoaga a le sui usufono. Ae ua ou manatu leaga o lea ua afe mai i le tatou Palemene ma maitauina ai ina ne i... leaga o la e faalogologo mai le atunuu, fesili muamua po ua fai se laisene o le Palemene. O le itu taua lena lau Afioga i le Fofoga Fetalai ua ou manatu ai e tatau ona faapulapula. O lou talitonuga, e leai lava se isi o tatou e le i faia se laisene. O le itu taua lena. Ma e tatau foi ona amatamea le Maota lenei, o tatou o Taitai o le atunuu, pe fai tatou avetaavale, e tatau lava ona e fealuai ma feaveai lou laisene, leaga o le tiute lena o leoleo e siaki ai tatou. A tomanatu e i ai faalavelave matuina na tutupu atu iinei i le Maota na maliliu ai nisi ona o sui o le Palemene. Na aveese ai foi lava nisi ma nofoa o le Palemene talu faalavelave tau taavale ona o le aafia o le soifua. O le nofoaiga foi lea na uma nei, na tuuaia ai foi le Minisita ma se tasi o faipule i le maliu ai foi o se tamaitiiti i Leauvaa. O lona uiga i le saunoaga a le sui usufono e taua lau Afioga i le Fofoga Fetalai, po o le a le auala tatou te omai ai ina ia fai uma a tatou laisene. O au lava ia, 1979, 1980 ua fai lou laisene amata, i tai i le MOT foi lea a o pule pea se tasi foi o tamalii ia Vaelua lea sa umi lona taimi. E faalua ona ou sue faatoa ou pasi. A o le suega faalua na aumai ai e le CEO ia te au le tusi Tulafono.

Ia e faitau lelei, ma e malamalama i le uiga o lau avetaavale ina ia sefe le atunuu. Mavae tausaga e 5 faatoa fai le laisene commercial mo le avepasi ma le aveloli, 5 tausaga o train as a private learner faatoa e me'i i le isi sitepu. A o le a le mea la e i ai i le taimi lenei? E 2 lava vaiaso i le private ae vaai atu ua sau i le loli. Ia lea ua tatou matau i le taimi lenei i le tele o faafitauli lea ua tutupu mai, ae na ona tatou faamanatu ma ave le tuualalo i le Afioga i le Minisita i le mea lea ua oo i ai le saunoaga a le sui usufono, faataua lelei le aoaoina o tagata o le a avatu i ai laisene nei mo le silafia. O le tali o le lelei ona faatonu o le laisene aoaoina lelei ma le faatulagaga, e leai ma sau sala tau taavale talu nei tausaga e tele. Aisea? E malamalama lelei i le tulaga o le faatinoga o le saogalemu, ia ma le tausisia o Tulafono i luga o le alatele. Faafetai Tuuu, ou te iloa ua manino, a o la e fai laisene a le tatou Palemene. Ia ma le agaga faaaloalo.

FOFOGA FETALAI: Malo faafetai. Malie se i tulai mai le sui usufono mo Sagaga 3.

Afioga Hon Sala Fata Pinati (Sagaga 3): Faafetai i le avanoa ua tuuina mai e lau Afioga i le Fofoga Fetalai. Ou te faamalo atu faafetai i le Afioga i le Minisita. E moni sa taua lo matou afioaga foi faapea e i ai se faalavelave na tupu mai, e moni, e sao lelei. O le tulaga lea na faapena ona sa fai foi le tiute o leoleo. Ma ou te fia faapoopo atu i le saunoaga a le sui usufono mo Siumu le Afioga ia Tuuu. O le tulaga lea i mea o laisene o avetaavale, e i ai foi se taofi e ao ona faia test o avetaavale uma lava i le tulaga foi lele o le fai

o tui foi ia e saili ai pe faaaoga le aisa. Mo le silafia e lau Afioga ma le paia o le Maota i lenei taeao, o le tulaga i le aisa o lo o i ai nei i le atunuu o le matua tele lava. E ala ona ou taua lea vaega, ona e i ai nisi o le vaega o lau auaigaluega sa faapea ona tuuaia foi ma maua sa taua foi ua latou tagofia le aisa. Ia, na fai lava le tulaga e pei ona masani ai o le faamalolo...

FOFOGA FETALAI: Ou te faamalie atu i le sui usufono mamalu, e i ai lou taimi e te saunoa ai, ona...

Afioga Hon Sala Fata Pinati: Faafetai. Faafetai, ae na o se vaega lau Afioga i le tulaga na o le faamanatu. O se tulaga lea leaga o le po'u e avea ma papala. O le ala lea e ala ai ona ou taua le vaega lea, e lelei ona faapea, e amata i le Maota nei. E tuu i fea tatou tui? Saili po o ai o tatou lea e avea le aisa ma le tulaga lea. Ma le faaaloalo lava.

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai, mo le faasaoina lava o le taimi o le sui usufono.

FOFOGA FETALAI: E te faauilavea i le saunoaga a le sui usufono mamalu mo Siumu?

Afioga Sulamanaia Fetaiai Tauiiili Tuivasa: Ioe, e sao lelei lava.

FOFOGA FETALAI: Ia, tulai mai le sui usufono mamalu.

Afioga Sulamanaia Fetaiai Tauiiili Tuivasa: Ia e faatalofa atu foi lenei itumalo i le Fonousu foi i lenei taeao, faamalo lava i le tulaga foi o le tatou auaunaga. Na o sina mea puupuu lava ona o lea na taua nai Minisita Lagolago. O le faipule lenei e ava tele ma faataua tatou o taitai o le atunuu i le lauga a le sui usufono lea faapea e tatau ona o e faasinosino le car paka. O lou lagona, ia a tuu nei le malosiaga lea i nai Minisita Lagolago, lona uiga e o atu CEO ua faatino mai e Minisita Lagolago galuega lava ia o la ua faamatuu i ai e CEO. E pei o le popolega lenei ne i te i ua... talofa e i nai Minisita Lagolago foi lea o le a o e... ae aua ne i aiaina fua galuega o lo o faatino e CEO ma le tulaga i le Matagaluega. Masalo e i ai le isi Paeaiga sa tuanai atu o ou faigaluega foi, ia pe sa Minisita foi le toaina foi i le matou Matagaluega, ia ua matou o atu, ua alu atu le Minisita Lagolago ua tiute mea o container. E pei e tau faapena se tulaga foi lea ta te popole ai, e alofa tele le sui usufono lenei ia outou Minisita Lagolago. O lea o le a o tou te faaeleelea i nei mea o car paka. Nonofo pea outou i totonu o outou ofisa ma fautua i le... e maua foi le avanoa leaga o lea ua taua nai Minisita Lagolago i le tulaga foi lea e fia malamalama ai foi le sui usufono i faiga faavae a le faigamalo lea. Ona o lea e maua lava, e pei o ananafi lea na tulai mai ai le

Minisita e ana le Tulafono ae toe tulai mai lana Sui Minisita Lagolago. Ia pei e tau faapena po o le a le faiga faavae e faapena ai e faatino ai nai Minisita. E ava tele le faipule lenei i Minisita Lagolago, tuu pea galuega i CEO ia ma lana Matagaluega e faatino. E pei e faapena se lagona e avatu i le finagalo foi o le sui usufono mai Siumu, le sui matua foi.

FOFOGA FETALAI: Ia, o lea ua manino atu le uiga o le faauilavea, ia se i tulai mai le si usufono mamalu o Siumu.

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia se i tulai mai le Afioga i le Minisita o Galuega Tetele.

Tofa Hon Olo Fiti Afoa Vaai: Lau Afioga i le Fofoga Fetalai, se ua ou vave tu atu lava faapea ai o se mataupu a laitiiti le mataupu lea o mea o... o lea ua tau sue e e o e vaai paka. Ae silafia foi e lau Afioga, so o se tagata lava e agai atu i le LTA e fai lana laisene, o aoga uma lava ia e fai i ai, e silasila e test, pe o e aoao pe faapei foliga o le mea e tau o le car paka a o le a foi le va e paka ai taavale i le isi taavale. Afai la e le o manino i ai se avetaavale, ia ou te iloa pe sa kopi pe a. Ae o aoaoga uma lava ia o la e fai uma lava i taimi e fai ai laisene ne i te i ua faapea mai e le o faia i ai se galuega a le tatou Malo. Faafetai.

FOFOGA FETALAI: Ia se i tulai mai lau Afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai ou te tulai atu ma le faaaloalo ona e pei sa ou lauga i le aso ananafi o nisi nei o manaoga po o nisi vaega faaopoopo ina ia atoa lelei le suega ina ia aua ne i i ai ni vaega foi ia e ono lapelapea ai le tulaga foi lele o le faaaogaina o le auala ma le taavale i luga o le aualatele. Na ou alu atu i Niu Sila talu ai nei e toe faafou lou laisene avetaavale Niu Sila. O au la ua ou tei e fai atu lau pepa ae fai mai le tamaitai la e i le counter, alu ifo e tilotilo i totonu o le mea lena e test ai lau vaai. E le o faia i inei le mea lena. E i ai le mea e te alu atu ona e tilotilo lea i ai ma fua po o sao ma lelei ma kilia lau silasila. A oo la i le taimi e ave ai lau taavale, o la e tele latou e fai mata tioata foi nei vaaiga. O le mea la ia na avatu ananafi, se i toe silasila i a tatou suega ina ia atoatoa lelei le tulaga o suega ia e fai a tatou. Aua e le o faia le mea lena i le taimi lenei.

FOFOGA FETALAI: Ia o lea ua maua atu.

Tofa Hon Lauofo Fonotoe Nuafesili Pierre Lauofo: Lea e i ai lou laisene avetaavale. O le tasi lena faataitaiga o mea ia e avatu ai fautuaga. Ia, ae lafo atu i lau Afioga i le Minisita ma le Matagaluega se i silasila ane i isi vaega.

Tofa Hon Olo Fiti Afoa Vaai: Lau Afioga i le Fofoga Fetalai, o se mea lava e fia faasao.

FOFOGA FETALAI: Ia se i saunoa lau Afioga i le Minisita.

Tofa Hon Olo Fiti Afoa Vaai: O le taimi lena masalo o le tausaga lena sa fai ai le laisene foi o le Afioga i le Taitai o le Itu Agai masalo po o le 30 tausaga talu ai. O le taimi la lenei, o la e avatu lava lau medical check o lau vaai ma mea faapena, ia o la foi ua i totonu o tatou faiga la e fai ai tatou suega laisene. Ae ou te iloa foi ua tatau ona toe siaki lau vaai ona toe faafou lea o lou laisene.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e tautala lava le mea sao.

FOFOGA FETALAI: Ua i ai le manatu lau Afioga i le Taitai o le Itu Agai o lea ua...

Tofa Hon Lauofo Fonotoe Nuafesili Pierre Lauofo: O le test lea ou te taua, e fai lava i totonu o le taimi foi lenei i le ofisa e fai ai lau pepa e toe faafou ai lau laisene.

FOFOGA FETALAI: Ia, o lea ua maua atu.

Tofa Hon Lauofo Fonotoe Nuafesili Pierre Lauofo: O le tulaga lena. A o le mataupu lava ia o le laisene avetaavale, e fai si lautele atu. E lautele le mataupu e le faapea na o le laisene avetaavale lea e taofia oe i luga o le auala. Pei ona saunoa le sui usufono, aua e tau sutesue foi po o a isi mea ia e mafua ai ona taofia, ona e i ai isi vaega e tatau foi ona agai i ai le silasila a le Ofisa o Leoleo. Ae faafetai mo le avanoa, o lena ua aumai lau faatagaga.

FOFOGA FETALAI: O lea ua maua atu, e fai ma e silasila mai i le Nofoa. E fai foi ma le ava atu, ae fai foi ma silasila mai. E lelei le faatonufofou o tatou galuega i le taitaiga a le Nofoa ona faigofie lea o le tatou galuega. O lea ua nofo le sui usufono mamalu e ana lona taimi a o lea ua fai lua fefinuaiga ma le Minisita. A o lea ua uma ona saunoa manino le Minisita, o la e i ai i totonu uma lava o suega na mea uma, ua umi ai fua ma le tatou taimi.

Tulai mai lau Afioga i le sui usufono mamalu e faaauau lau saunoaga.

Tofa Hon TUUU ANASHI LEOTA: Faafetai i lau Afioga i le Fofoga Fetalai. E faamalo atu foi i lau Afioga le onosai i le le usitaia e nei sui usufono o lou finagalo lau Afioga. Ae o lou lava manatu foi sa tuuina atu o manatu e faatupu manatu e le faapea o le a fai ai pei ona aumai foi finagalo e pei lava o le tatou Maota tatou te omai e faufau ma lafo aso i mea e manuia ai le tatou atunuu.

Na pau lava si mea lea e fia faasao i le saunoaga a le sui usufono mo Vaimauga, o si au Minisita Lagolago faapea ua alu atu tiute mea o container. E leai e faamalulu atu, e leai e le o se mea lena sa faia ona sa fai atu e alu e vaavaai ma tilotilo po o lelei le faatinoga o galuega. E pei o le agaga lena, ae le i alu atu e fai ni tiute e le mafaia ona fai e ia se mea faapea. Ia ma lou faaaloalo.

Ae na pau lava le mataupu sa ou laga, o Ale po ua fai sona laisene. A o faafofoga mai lau Afioga i le Minisita o Leoleo, ia se i logo atu i le Matagaluega e aua ne i toe taofia matou, pe poloka atu pe a alu atu i o toe taamilo mai toe poloka foi. Ia a vaai mai ea o le faipule tuu e o, o lea ua faafofoga mai i le Palemene, o lea ua uma ona fai laisene.

Ia, o nai manatu na lau Afioga i le Fofoga Fetalai e tuuina atu i lenei itula. E momoli atu le faafetai ma le faamalo. Manuia tele le tatou fonotaga i lenei aso.

FOFOGA FETALAI: Malo faafetai.

Tofa Ale Vena Ale: Lau Afioga i le Fofoga Fetalai faamolemole lava, leaga o lea ua faatolu ona tau lou igoa, ae o lea lava ou te musumusu atu i ai ua uma ona fai lou laisene ae o la e lava e tau lou igoa. Ua uma ona fai lou laisene faamolemole Tuuu. Faafetai i lau Afioga i le Fofoga Fetalai.

FOFOGA FETALAI: Ua lelei, mea sili o lea ua manino lea itu. Faafetai. Ia o le avanoa lea, tulai mai lau Afioga i le Minisita Lagolago le sui usufono mamalu mai Lefaga ma Faleaseela.

Afioga MASINALUPE MAKESI MASINALUPE (Lefaga ma Faleaseela): Faafetai mo le avanoa i lau Afioga i le Fofoga Fetalai. Ae ou te le i aea le loto nai le fatifatimeaaluga ou te muai sii lava le siliga ma talia punaaaoo nai le faasouga ina ne i le mateia le tupua nai le siu o Avarua. A lele ua sooula le fala, ua tini foi le matalalaga ae matamio e pei o le fetalaiga nai Aleipata.

I lenei taeao pei ona saunoa lau Afioga i le Fofoga Fetalai e tusa ai o le tatou faapolo ma le faasani, e piiama foi i ai le sui usufono o Lefaga ma Faleaseela. Ae muamua ona ou faatalofa atu i lau Afioga i le Fofoga Fetalai. E ofo alofa atu foi i lau Afioga i le Tamaitai Palemia, Afioga i le Sui Palemia ma Minisita o le Kapeneta, e faapea foi Minisita Lagolago aemaise o le afio

mai o le Afioga i le Taitai o le Itu Agai ma Afioga i sui usufono o le Palemene. Malo le onosai, malo le faapalepale.

E le galo foi le tatou mafutaga ma Ofisa Sili o Pulega o Matagaluega a le Malo i o outou faiva alofiaao aua le feagai ai ma outou tiute, e faapea foi le Ofisa o le Fono.

Le tapuaiga mau a Faafeagaiga taulagi o lo o nono ni manu aua le manuia o Samoa. Ia, le tatou itumalo, tapuai maia se i fai se sao o le sui usufono aua foi le Tulafono Tau Faaofi e pei ona taatia i lumamea. E le umi se talanoa i lenei mataupu aua e manino lava na o le fesui ai lava, na ona toe aumai lava mai le Matagaluega o Leoleo e toe faafoi i le LTA. Ou te manatu foi o aiaiga uma lava ma Tulafono o la e lava ua maioio ma manino atoatoa. E leai foi la se isi vaega e toe oo i ai, pau o lea e matua lagolagoina e le sui usufono le tulaga e pei ona i ai o le toe faatea atu o le galuega lea e faatino e le LTA. Aua e maitauina, e fai lava si tele o galuega o lo o feagai ma le LTA aemaise o lenei vaitau. O lea foi e mau le galuega sa feagai ai foi i le motu tele i Salafai, o le upu moni e le faigofie. Ae momoli le faamalo ma le faafetai i le feagai ai foi o le Matagaluega ma lea galuega tele, o lea na mau i le saunoaga a le Minisita e le i malolo i le po talu ai le taumafaiga. Ia o ni faamatalaga la e faapea e leai ni galuega o faia ma... ia e talitonu lava aua le mea galuega lelei ua faatino e nisi, ona e le faigofie le galuega o feagai ai.

Ae pau o lea o nai lagona e pei ona i ai, e momoli atu le faafetai tele i le tulaga foi e pei ona i ai le Pulega, ona o lea ua amata ona faagasolo atu nai patupatu lea i le agai atu i si o matou itu lea ia matou i Lefaga ma Faleaseela faapea foi Safata. Ia o le uiga o se faamatalaga o le saogalemu, o le saogalemu lava lea e... e ui lava e le o le Tala o le Tupe, ae ona o lea ua faagasolo le suiga e toe faafoi atu, ia atoa ai la ma lea foi ua i ai le talitonuga o le Pule Sili ma le Pulega, o le a faagasolo atu. E pei lava e i ai le manaoga i se faailoilo o lo o i i ia matou o lo o i ai ma le aoga faataitai, mo le silafia ua tele lava nai soifua foi ua fano ai, ae o le agaga lava lea e faaoloolomaaui atu ai ina ia faatino le vaega lea mo ni faailoilo e iloa ai le pioga lea leaga e fai lava sina matuia, atoa ai la ma nai aoga ia, ua fai si tele o taavale e o atu ona o le tele o mataaga, ia o le puipuiga lava ia ina ia faatino nai humps po o nai patupatu ia mo nai aoga. Ae faafetai tele lava mo le faatalatalanoaga foi ma le CEO, o lea o le a faagasolo atu ai lea vaega.

O le tulaga tau laisene e fia oo i ai se tala, o aso ia i le suega o laisene o le matua faigata lava ona e leai ni taavale otometi, sa faaaoga lava taavale suikia. O le tele o le taimi lenei ua tele taavale, a o le mea sili ma le taua o lea ua faamanino mai o lea lava ua iloilo lelei le faiga o ia vaega.

Lau Afioga i le Fofoga Fetalai, ia ua maea atu ai ma se faamatalaga i lenei itula. Ia manuia tele lau Afioga i le Fofoga Fetalai, le paia o le Palemene ae faapea foi sui usufono mamalu uma. Ia manuia.

FOFOGA FETALAI: Malo faafetai mo le saunoaga a le sui usufono mamalu e fesoasoani foi i le Tulafono Tau Faaofi.

Ia o le avanoa lenei o le sui usufono mamalu mai Falealupo le motu tele i Salafai.

Tofa FUIONO TENINA CRICHTON (Falealupo): Faafetai mo se avanoa matagofie o lenei foi taeao i lau Afioga i le Fofoga Fetalai, faapea foi le afio o le Palemia ma le Kapeneta, le Afioga i le Taitai o le Itu Agai aemaise foi o le paia o le Palemene o Samoa ua usuia le Fono i lenei aso o ana fonotaga masani, aemaise foi o nai o tatou uso i Ofisa Sili o Pulega o Matagaluega ae faapea foi le tapuaiga i si o tatou atunuu. O lo o outou po pea le fala ma feula mulila aua la outou nofo tapuai. Ia o lenei foi la taeao ma le taumafai atu o se leo o lenei foi itumalo ona o le tatou Tulafono Tau Faaofi.

O le taua ia o lenei Tulafono, ona o mea tau taavaleafi malolosi i luga o le alatele. E leai lava se taavale, pe laititi lava le taavale, a lavea lava le tagata e maliu ai lava. Po o le loli foi i luga i le tilotilo ma le vaai, e le faigofie ia ituaiga tulaga. O le vaitaimi sa i ai talu ai, ia, sa tutu i le agavale foepu o taavale, e taugata taavale sa aumaia i fafo, o Amerika, Tutuila, Siamani, aua o atunuu na e tutu i le agavale le foepu. Ia e oo mai iinei le taavale ua tai \$100 ma ona tupu afe le tau. Ae faafetai i le suiga o le ituala ua mafai ai ona latalata mai le mea e tafe mai ai le manuia, o lea ua afae ai le atunuu, ua oo lava i nai fanau o lo o malaga faavaitaimi, ia o mea lava ia e omai faatau, o taavale, e tau sui ai se isi laasaga o le aiga i totonu aua foi le tautuaina o le galuega a le Atua, aemaise foi o le nuu ma afioaga.

O le mea o lea ua tupu ua manaia auala, ae ua tele tele nei patupatu o lo o i ai. E fai mai outou ia lava patupatu ae ou te fai atu, leaga lava le mea e faalavelave i auala pe a feoai, o mea nei o patupatu. O le isi mea, o nai toeaia e galo ia te ia le mea la e tuu mai luma o le patupatu, ae alu atu oso i luga faapenei. Ia, o mea faigata ia. O le siosiomaga lava ia ma le faiga o le Tulafono ina ia saogalemu, ae i ai foi ona afaina i tulaga faapea e ono aafia ai, aemaise o le Afioga i le Minisita o lo o fealuai atu i le faatinoga o galuega nei. Ia, o nai fautuaga e tuu atu faapena, ia a va lava i le tai 2 maila le patupatu, ua manaia lea ua mamao atu. A o le putuputu lea... O i i le afioaga lea i Safotu, ia ua ta tilotilo ita i ai, oh, e le... alu atu patupatu, alu atu patupatu, alu atu patupatu. Ua le manaia i se feoaiga o taavaleafi.

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Malie lau Afioga i le sui usufono ua taua patupatu, ia lea se i saunoa mai le Afioga i le Minisita.

Tofa Hon Olo Fiti Afoa Vaai: E faamalulu atu i le Afioga i le Sui Minisita, ona e pei a tau feteenai le mea lea o le patupatu ma le leai o se patupatu. Lau Afioga i le Fofoga Fetalai, pau lava vaega o le auala o lo o tuu i ai tulaga ia o faapatupatu mo le saogalemu, o luma o aoga, ma luma o malumalu. A o nisi patupatu faaopoopo, ia o talosaga lava a faipule ma alii o afioaga, e i ai la le talosaga foi a le faipule o lo o saunoa, ia se i uma ona toe aveese lea pe a faapea o lou finagalo lena. Ae o le tulaga lava ia, o le saogalemu lava lea tatou te tagatagai i ai aemaise lava fanau aoga i le taimi e tuua ai ma le taimi e gasolosolo ai i le aoga. Ae o le tasi la lena mea ou te iloa foi o le a valaaulia foi lau Afioga e te lua toalua atu ma le Taitai o le Itu Agai se i siaki lua silasila po o mamao pe leai ona toe faafou lea o lua laisene. Ma le faaaloalo.

FOFOGA FETALAI: Ia, masalo o la ua maua mai e le sui usufono mamalu, o lea ua tali manino le Afioga i le Minisita i lou fanoga...

Tofa Hon Lauofo Fonotoe Nuafesili Pierre Lauofo (Taitai o le Itu Agai): Lau Afioga i le Fofoga Fetalai e...

FOFOGA FETALAI: Ia, o le a le mea ua tulai mai, o i ai se mea ua faaletonu?

Tofa Hon Lauofo Fonotoe Nuafesili Pierre Lauofo: Ia ona o la e pei ua saunoa mai le Afioga i le Minisita o au e le o lelei lau silasila foi lea i le tulaga, ae o lea ou te tau atu ma le faaaloalo, e matua lelei lava lau vaai ma masau, e ati lau vaai i lau Afioga, e matua ati lava. Ioe. A o lau ia vaaiga lea e fai, mo le faitau tusi lava foi lele. Ioe. Lau Afioga i le Fofoga Fetalai e faamanino atu ai lea mea, e le o faaletonu lau silasila, e le o faaletonu.

Tofa Hon Olo Fiti Afoa Vaai: Lau Afioga i le Fofoga Fetalai, ua matua sui lava lau faalogo i le Taitai o le Itu Agai. Ua sui lau faalogo ma lau vaai i le Taitai o le Itu Agai i le taeao lena. Ou te iloa lava o la e... manaia pe ana i ai ni tatou siaki e siaki ai ma e onana mai totonu o le Maota.

FOFOGA FETALAI: Ia tulai mai le sui usufono mo Falealupo.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leai ou te le o faasuaava. E leai, o la e silasila mai foi lau Afioga. E ui lava... O le Afioga i le Minisita lea, e valaaulia soo au fai mai ma te o e inu se ma pia. Ou te le alu au i na mea.

FOFOGA FETALAI: Ia, ua lelei o lea ua maua atu le...

Tofa Hon Lauofo Fonotoe Nuafesili Pierre Lauofo: Ae o lea foi ou te silasila atu ma la'u vaai o la e matuai lelei lava le silasila a lou uso a faipule le Afioga i le Minisita Lagolago mai Falealupo leaga o maua e i ai le ma sootaga faa-Falealupo. E sao Fuiono?

FOFOGA FETALAI: Ia ua lelei. Faafetai. Malo. Ua i ai le manatu le sui usufono mamalu mo Falealupo, ia o le Tulafono Tau Faaofi mo le aumaiga i le LTA. Ia, faaauau le saunoaga.

Tofa FUIONO TENINA CRICHTON: Faafetai. Aua e tele lava fautuaga e fia avatu, a o le sui usufono lava ia o Falealupo, e matua talia ma le faafetai le Tulafono, e lagolago malosi i ai. A o nai mea ia o lea o lo o tilotilo i ai, ona o taavaleafi nei o lo o faaoga i taimi uma taimi uma.

O le isi foi mea o nai leoleo, poloka nei o lo o fai i luga o le auala. Ia, falua lava o la e o lo o fai le tiute o leoleo, ae ua ese foi le avega e tagata o lea vaega fai mai ua sue ai mea ma a igoa o mea, ae leai o la e fai le tiute o leoleo. E ese uiga o le atunuu ma le latou faatinoga. Foi mai se upu po o le a se faalogologo i ai, ae leaga ua ou faalogo i ai i upu ia, aua o le matou itumalo, e faafetaia lava le Ofisa o Leoleo, leaga e mamao i tua ae televavave le o o taavale. Ia a le vave le faiga o poloka a leoleo, e ono afaina ai se tasi.

O le tulaga foi lea mo i latou foi nei o lo o taumafaia tulaga i luga o auala e tau faasinoino ma mea faapena, e sao ai foi le sui usufono mai Siumu, manaia aua o lea e i ai Sui Minisita, le aualii lapopoa ia, a le o lena, tuusao lea i o i le latou toatolu e o latou e faia ia mea, o lea e tele galuega a Sui Minisita e fai ae le o o i ai i ia mea.

O le lagona la o le tatou mataupu i lau Afioga i le Minisita aua le tatou gasologa o le aso ma lona faatinoga, ou te lagona ua vave le faatinoga o le tatou Tulafono Tau Faaofi, ua ou iloa foi ua vave ona oo i le taimi e faai ai. O le lagolago lena a lenei itumalo o Falealupo aua le tatou Tulafono ua i lumamea nei aua lenei aso. Ia manuia le Fonousu a Samoa.

FOFOGA FETALAI: Malo faafetai saunoa.

Afioga Sulamanaia Fetaiai Tauiiili Tuivasa (Vaimauga 1): Lau Afioga i le Fofoga Fetalai o sina mea laitiiti lava.

FOFOGA FETALAI: Ia, e i ai se...

Afioga Sulamanaia Fetaiai Tauiiili Tuivasa: E taua tele i lenei sui usufono le auaunaga a le mamalu o le atunuu i e le o mafai ona faailoa leo. E le matagofie lea saunoaga o leoleo sue mea, pei o le tulaga lena o lea sa saunoa i ai le sui usufono mamalu lea. Pe mafai ona aveese ma faamaumauga. Leaga o alo ma fanau a le atunuu lea e auauna, e le faapena

le faatioga o tiute ma auaunaga, ia a o tatou o le Palemene e tatau ona tatou faaeteete ai i ituaiga saunoaga lea na saunoa ai le Minisita Lagolago matua foi o lea itu.

FOFOGA FETALAI: Se i tulai mai lau Afioga i le sui usufono mai Falealupo.

Tofa FUIONO TENINA CRICHTON: Faafetai. E leai e le o se upu faapea o se upu ou te fatua, a o le upu ou te faalogo i ai i tagata. E le o se mea na faia e Fuiono, ae o tala ia o lo o fai i luga. Leai e pei lava ona ou faamalulu atu, leaga ua avatu se leo ona o le agaga ina ia faagata ai le toe tautatala i ai o tagata i upu ia. O le agaga moni lena o le avatu. Ia ma lou faaaloalo.

FOFOGA FETALAI: Ia, faafetai. Na pau lava lena o le faaletonu o lau saunoaga ona e le i taua e se lauga i totonu o le Palemene le tala lea, atonu o se tala faalogo i tua, a o totonu lava ia o le Palemene e le i i ai se lauga faapea ua lagalaga ai se tulaga faapea. Ae o le mea foi lena e faaeteete foi tatou i lauga foi nei faalauaitele ma taua ai ni talanoaga i tua. Ae lelei lava, o mea e lagatila i totonu o le Maota, o mea na e ono oo i ai tou saunoaga, ae taua foi le faamanatu. O lea foi ua faamanatu mai le sui usufono, ia ua faatonuina le Failautusi ina ia tuueseina ia faamaumauga mo a tatou faamaumauga.

Se i tulai mai lau Afioga i le Minisita o Leoleo.

Afioga Hon Faualo Harry Jeffrey Schuster: Lau Afioga i le Fofoga Fetalai na o le fia faamauina lava, e leai ni tatou leoleo sue mea, na o leoleo e faamalasia le Tulafono la e i ai.

FOFOGA FETALAI: Ia o lea ua manino le saunoaga a le Minisita, o lea foi ua aveese ma tatou faamaumauga. Ia, o lea ua maitau atu ua faamalieina...

Ia se i tulai mai le sui usufono mo Safata 2 lau Afioga i le Minisita Lagolago.

Afioga LAUMATIAMANU RINGO M. PURCELL (Safata 2): Faafetai mo le avanoa i lena taeao o lea ua logo faafofoga foi nisi o manatu ua faaalia i le tatou Tulafono Tau Faaofi. Ia e malamalama lena usugafono o lea o le a sifi tulaga foi e aumai mai i i le Matagaluega o Leoleo e avatu i o i le Matagaluega o le LTA. Ae na o nai fautuaga i mea tau laisene. I lau vaavaai i ai i tulaga o laisene avetaavale, ia pei e faatatau i lau Afioga i le Minisita o Galuega, o le tele lava o laisene ia e i ai nei, e pei e alu atu loa sue le laisene, a o le tulaga e tatau ona i ai, pe le tatau ona fai se tatou aoga, driving school

e faapena ona auai atu i ai ni outou alo ma ni fanau ma i latou foi ua iloa avetaavale e toe aoga ai. O le aoga o le tulaga lea...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa.

FOFOGA FETALAI: Malie le sui usufono mamalu se i tulai mai le faauilavea a Vaimauga 1.

Afioga Sulamanaia Fetaiai Tauilili Tuivasa: E manumanu lava leni Nofoa i sui usufono mamalu o le Palemene. E pei o le mea foi lena sa ta faamanatu atu nei i le taeao, lea e saunoa le Minisita lea o le Minisita Lagolago e ona le la Tulafono lea. Ia e pei o le agaga lena e avatu ai, o lea ua toe saunoa mai lava i le laua Tulafono ae a pe a musumusu ifo i tua, o le Tulafono lea o le Tulafono a le Minisita o le LTA faatasi ai ma lana Minisita Lagolago.

Ia pei o le agaga lena o lea e tau tuli tamoe le tatou... a o lea ua toe saunoa lava laua i le laua Tulafono. Ma le faaaloalo lava.

FOFOGA FETALAI: O lea ua maua, e le mafai foi ona tuia lagona o faipule mai o latou itumalo, ae faailoa foi ni mea o lo o lagonaina e tataua ona faaali ai o latou finagalo i totonu o le Palemene, ae o lo o i ai lava le tofa i a outou Afioga i Minisita Lagolago i le tou felagolagomai ma le Afioga i le Minisita aua le tulaga i mataupu faapenei. Se i tulai mai lau Afioga e faaauau le saunoaga.

Afioga LAUMATIAMANU RINGO M. PURCELL: Faafetai mo le toe avanoa. Ia leai o manatu lava ia o manatu faa-Fono, o le itumalo foi leni, e le i omai e musumusu i tua, e fai atu lava iinei manatu foi o Safata 2 e tai pei foi o Vaimauga. O le agaga lena, ia, e avatu lava...

Afioga Sulamanaia Fetaiai Tauilili Tuivasa: Lau Afioga i le Fofoga fetalai o se mea e fia faasao. O le Tulafono leni o le Tulafono a le Minisita ma le Minisita Lagolago...

Afioga LAUMATIAMANU RINGO M. PURCELL: Ioe, a o manatu o le faipule mai Safata...

Afioga Sulamanaia Fetaiai Tauilili Tuivasa: O le agaga lena o lea e tau avatu ai se...

FOFOGA FETALAI: Malie le sui usufono mamalu o lea ua fai atu le tala a le Nofoa e tatala lava le avanoa i Minisita Lagolago e saunoa ai aemaise

foi o manatu ma finagalo o latou itumalo. O le mea lea malie lau Afioga i le sui usufono mamalu o lea ua avatu le faatagaga a le Nofoa.

Saunoa lau Afioga i le sui usufono mamalu.

Afioga LAUMATIAMANU RINGO M. PURCELL: Faafetai. O le tulaga lea pei ona tatalo atu ai, e leai o fautuaga e le o se faatonuga. A o le tulaga leaga o le tatou Tulafono o lea o le a sifi agai i le LTA, o le ala lena e tatalo atu ai, pei o le silasila a lau Afioga i se tulaga foi o se tatou aoga, e le gata o le driving school, a o le taimi tonu foi lea e ao ai ma le defensive driving i le tulaga foi ina ia lava le aoaoina o i latou o le a faafoeina taavale. Ia ma se i toe silasila ifo i le tulaga foi o tausaga o lo o faatagaina ai learners license ma tulaga foi o tausaga o lo o issue ai laisene o avetaavale, aemaise lava o avetaxi ma avepasi o i latou o lo o faafoeina le feaveaia o le mamalu o le tatou atunuu i tulaga ia e silasila pea i ai lau Afioga, ia pe le alagatatau ona toe faia se tatou aoga.

Ia, ona oo mai lea i le tulaga lea lau Afioga i le Minisita o Leoleo, o fautuaga lava. I le silasila i ai i le tulaga i taeao e ese le pisi o le auala i le tulaga foi lea o le feoaiga, aemaise lava o lo o feoai lava loli tetele ma masini i le taimi lea i le taeao. Ae se i toe silasila lau Afioga pe le faavagavaga taimi ia mo i latou o lo o momoli mai fanau i aoga ma galuega, ae a maua le avanoa lea i le 7 agai i le 9 e faavagavaga mo i latou o lo o aga mai i galuega aemaise foi o fanau i aoga, ae se i maea le 9 i le taeao ona faatoa mafai lea ona feoai loli tetele ia, e feaveaia ai masini.

Ia, ona oo mai lea i le tulaga foi lea o taavale pasi, na ou vaai i le tulaga foi o taavale, e i ai lava isi taavale ua ese le tino ae faifai mai tua pau o taavale. O tulaga ia e silasila i ai le Matagaluega o lo o nafa ma le pasiaina o taavale, aua a oo nei i mea o auala foi ia e vaiti, ia e ese ona ta soso agai tua e matuai ota tu lava, ae leaga e lapopoa pau o taavale. Ia se i silasila i ai i latou o lo o pasiaina taavale i le tulaga o le saogalemu, aemaise foi o le tatou speed limit, pe le o i ai se fuafuaga e toe siitia le tatou speed limit. O le taimi lena e 35 maila i le itula i tua atu o le 2 maila mai le taulaga. Ia o le vaavaai lava foi i ai, o le tele o taavale a oo ina slow taavale, ua slow ai lava ma feoaiga ma poloka ai lava ma le auala. Se i toe silasila pe le tuu atu i luga o le 40 maila i le itula e feoai ai tatou taavale o lea foi ua lautetele tatou auala i tulaga foi o feoaiga.

Ia e fautuaina foi lau Afioga i le Minisita, e le o se faatonuga, i le tulaga foi o tatou bus stop. O le tasi lea o vaega o lo o poloka ai lava tatou auala i le taeao, aua e sau sau lava le pasi tu ia ona tutu atoa lava lea o le kiu taavale, e le o lava se vaega e me'i i ai pasi, ae pe le faailoga lelei ni vaega e afe ai le pasi i tua i le tulaga e tuu ai, ia pe va i le 100 mita i le isi bus stop a ia faigofie ma aua ne i poloka o tatou auala. E ese le faaososo agasala o lena mea i le taeao ta te sau ua uma lata lotu ae ta sau e faaita ita e le avepasi i le tui le moa o le auala i le tulaga o feoaiga.

Ia, o le tatalo atu lena a lenei sui usufono, leaga o lea sa faaalua foi e nisi sui usufono le tulaga foi o le matou galuega fesoasoani i le tulaga foi o le tatou auala, ia o tatou o faitulafono, o tatou uma foi o leoleo. Afai e tipi lau taavale i se tulaga e te iloa e lamatia ai le soifua, ia matau mai le numera ona ave lea i leoleo latou te faatinoa lea mea i le tulaga foi o lea e faalogologo atu. Ia ona o tatou e leai lava se isi o tatou e i luga atu o le Tulafono. A o le matou tatalo, o tatou uma lava o leoleo tatou te au uma foi i le fagota, ae aua tatou te oo i le mea e le au i ai le tatou malosi.

O le matou faamatalaga lea, ia manuia le Fono.

FOFOGA FETALAI: Malo faafetai foi le saunoa ma faamanatu foi fautuaga aua le tatou Tulafono Tau Faaofi.

Ia se i tulai mai le sui usufono mamalu mai Vaimauga 2.

Tofa LENATAI VICTOR FAAFOI TAMAPUA (Vaimauga 2): Faafetai i lau Afioga i le Fofoga Fetalai e tusa ai foi ma le avanoa o lou nei sui usufono po o lenei foi itumalo e avatu ai foi se sao i le tatou Tulafono.

Ia, muamua e le faaitiitia le faapolo ma le faasao ia manuvao, aua o le viiga ma le faamanu e tumatila lea i le Atua. Lau Afioga i le Fofoga Fetalai, o le a agai tonu se manatu ma se lagona foi e tusa ai foi ma le tatou Tulafono o lo o faapena ona talanoaina. E lua lava nai vaega ia e fia avatu ai foi se sao o lenei sui usufono. O le vaega muamua, faafetai o lea ua manino ma malamalama lenei itumalo i le tulaga o le a see ai le Tulafono mai le isi Matagaluega i le Pulega. E talitonu foi lou nei sui usufono, o se mea lelei foi le vaega lea, o le a feagai lava le Matagaluega ma le Pulega i le latou lava matafaioi faatino. O le a le toe i ai le galuega e fai e Matagaluega e lua, o le a manino lava le matafaioi o le a faatino e le Matagaluega o Leoleo o le traffic aemaise o le laiseneina o taavale i le Pulega o Felauaiga.

O le tuualalo lau Afioga e fia avatu i le Afioga i le Minisita aemaise foi o le Matagaluega o le a feagai ma le laiseneina o taavale, aemaise foi laisene o tagata avetaavale. O se auala e mafai ai ona puipui taavale ia e faatau i tua, e le o faataua mai car dealers, a o taavale o lo o faatau mai tua, ia puipui ai e o lo o resitala ai le taavale ma le o le a sauni e faatau mai le taavale. O le uiga o le faamatalaga ona o lea e sau i totonu o le tatou Tulafono i le tulaga lea, e tapena e le o lo o resitala ai le taavale le tusi. A o se tuualalo pe mafai ona fai i le tatou Pulega se standard format e faafaigofie ai, ona ua i ai mea ua tutupu lau Afioga i le Minisita ma le Matagaluega, fai le feagaiga i tua, avatu le tupe ma fai mai, ia o lea o le a avatu le tusi e faamaonia ai le vaega lea. Ae i ai le mea e tau o le faatamala. Lua vaiaso e le i oo lava e resitala le taavale e transfer ai le ownership ae lavea le taavale, ua aafia ai loa lea ma vaega uma ia e lua. E pei o se tuualalo lea pe mafai ona tagai le Pulega o le a faeagai foi ma lea galuega i se auala e mafai ai ona aloaia, aloaia le

transaction lea ae le i aveesea le taavale, i le faatau lea lea e faatau mai tua i le tagata taitoatasi.

Lau Afioga e fia faaiu se faamatalaga e faaleo ai se faafetai i le Afioga i le Minisita o Leoleo ma Falepuipui aemaise le Matagaluega, i latou ia sa feagai foi ma lea galuega. Faamalo faafetai mo le galuega. Aua sa ou oo atu foi i uta i totonu o ia tausaga o feagai foi le tou Matagaluega ma le laiseneina o taavale, e le faigofie, e le faigofie le tou galuega. Faamalo faafetai. Ae silisili ona ou faamalo ma ou faafetai i le faamama-avega lea sa e aumaia mo le mamalu o le atunuu, le 20% lea sa toesea mai i le totogiina o le laiseneina o taavale. Ia, o le tuualalo, aua o lea o le a see nei i le Matagaluega o Galuega Tetele po o le Pulega o Felauaiga, ia, o lenei vaitau o lo o tatou i ai, e le o lilo foi i le silasila a le tatou Malo le tulaga o lo o i ai le tatou tamaoaiga aemaise le lalolagi atoa. Ia e leai se afaina ae toe faaopoopo i ai se isi 20% i le toesea mai o le laiseneina o taavale.

Ia, lau Afioga i le Fofoga Fetalai, faafetai mo le avanoa. Manuia tele le tatou Fono.

FOFOGA FETALAI: Malo saunoa. Ia se i tulai mai lau Afioga i le Minisita o Galuega Tetele.

Tofa Hon Olo Fiti Afoa Vaai: Lau Afioga i le Fofoga Fetalai, ia na o si vaega puupuu lava lea pei ona taua. E taua le saunoaga a le Afioga i le sui usufono i mea ia o faatauga taavale i tua. Ou te iloa o se mataupu e le au tele i ai se faiga foi lea e fai e le LTA ona o tradings ia e fai i tua e tatau ona mautu i ai se Tulafono faapena a le tatou MCIL. Ma e i ai lava le tulaga foi lea o le tapa muamua mai le tulaga o se tusi pe a faapea i o i le LTA i le ona le taavale ona faatoa ave lea o se tupe, e faigofie lava nai mea faapena. E sao e tele lava i le tatou faatamala i le tulaga lena, ae ou te iloa o se mataupu e ao ona tuuina atu i lalo o tradings e fai ai se fuafuaga faapena.

Ae lau Afioga o le tulaga foi lea na e saunoa i ai i le 20%, manatua foi o lea na 2 lava nai tausaga ia na tuu mai ai le tatou stimulus package, ae se i taatia maia lou finagalo, atonu e oo atu i lena ua toe siisii laitiiti i luga pe a pe tumau pea. Faafetai.

FOFOGA FETALAI: Malo faafetai. Atonu o lea ua manino lea tulaga ma le faafogafoga mai.

Ia se i tulai mai le sui usufono mamalu mo Sagaga 4.

Afioga TAGALOATELE PASI POLOA (Sagaga 4): Faafetai i lau Afioga mo le avanoa o lenei itumalo. E faafeiloai atu i lau Afioga i le Fofoga Fetalai i lenei taeao matagofie. E faapea foi ona faafeiloai atu i le afio o le Afioga i le Tamaitai Palemia, le Sui Palemia. Afio foi le Afioga i le Taitai o

le Itu Agai, le Aiga Minisita, Minisita Lagolago faapea sui usufono o le Palemene.

Ae ua ou tulai atu e fia fai foi se sao o lenei itumalo e tusa ma le Tulafono Tau Faaofi ua taoto nei i lumamea. O le alofa o le Atua ma Lana tausiga ou te talitonu o lea ua maea ona e tapui lo tatou taeao i le tulaga, ae o le a ou see sao loa e tusa ma se manatu o lenei itumalo e tusa ma le Tulafono Tau Faaofi.

E momoli lava le agaga faafetai, e faalogologo foi ma le totoa i folasaga a sui usufono mamalu o le Palemene i lenei taeao faapea foi le aso ananafi, ona maua ai lea o se lagona ma ou te talitonu foi ua matagofie mea uma ua tofusao i ai faipule o le Maota.

O le vaega muamua e tusa ma le Tulafono Tau Faaofi o le liliuina atu o le galuega sa i aao o le Malu o le Malo, ia e lagona lava le agaga faafetai, ua matagofie. E lagolagoina e lenei sui usufono le suiga e pei ona i ai. O le vaega muamua e sili ona fiasia i ai, ona ua faafaigofie foi i le matou faaitu ona o le nofoaga o lea ua i ai ua latalata atu i le matou itumalo. O le a le afaina pea la le itu o Anoamaa ma le isi vaega lea e toe tau aau mai i le mea o lo o pasi ai tatou taavale. O le vaega muamua lea e fiasia i ai lo matou itumalo.

O le vaega lona lua e pei ona taua i le aso ananafi e le Afioga i le Minisita o Leoleo, o le tuuina atu o le malosiaga e mafai ai e leoleo ona faatino nisi o vaega e pei ona taua e nisi o sui usufono i le aso ananafi ona o le toatele o avetaavale e le o latou aloaia nai vaega e pei ona tuuina atu o le faaleotetele o laau ma vaega o lo o faaopoopo i taavale feoi. E pei o nai vaega ia na lagalaga i le aso ananafi, ona e le i malamalama lou sui usufono pe moni le saunoaga a le Minisita o Leoleo ona o lo o faatali se malosiaga e avatu e le Palemene e mafai ai e leoleo ona foia lea faafitauli. E talitonu lou sui usufono, afai e faamalosiaga lea vaega ma tuuina atu le malosiaga i leoleo e mafai ai ona avatu loa le taavale ua le usitaia, ave loa i le fale o leoleo ma aveese loa. E pei lava o se malosiaga o tagata e feaveaia mariuana ma aisa, o le taimi lava e maua ai aveese loa. Ae ou te manatu afai e faataunuu le faamoemoe lea, pe tolu lava taavale e aveese laau e leoleo amata loa ona le toe faia. E faapea foi i nai vaega pei ona taua nei foi i le saunoaga a le Minisita Lagolago o le vaega o Galuega Tetele ona o vaega ia e i totonu le taavale ae patupatu i fafo pau. Ou te lagona a faamalosiaga le vaega lea e le vaega o leoleo, ona maua foi lea o se toa ma filemu ai finagalo o le atunuu i nai tagata ia e le o mafai ona aloaia fautuaga a le vaega o le tatou Matagaluega. Ae matua lagolagoina lau Afioga i le Fofoga Fetalai e lenei itumalo le faamoemoe e pei ona i ai le fuafuaga o le Tulafono Tau Faaofi i lenei taeao. Manuia tele lau Afioga, manuia le usugafono. Soifua.

FOFOGA FETALAI: Ia, malo faafetai, malo mo le saunoaga, o lea foi ua faafofoga le Afioga i le Minisita, atonu o se taimi e i ai le avanoa o le

Afioga i le Minisita e faamalamalama ai foi mea o lo o finagalo i ai le saunoaga a le sui usufono mamalu.

Ia, ua i ai le manatu o lea ua tatou taunuu i le taimi o le tatou malologa masani o le taeao. Ou te faasilasila atu o le a faataatiaese nei galuega a le Fono Aoaofa Faitulafono mo le tatou malologa masani o le taeao.

Na faataatiaese Taualumaga o le Fono Aoaofa Faitulafono mo lana malologa masani i le itula e 10:44 i le taeao ma toe faaauau i le itula e 11:29 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofa Faitulafono.

Ou te manatu ua saoialo le taligasua ma le tauteaga a le paia o le Palemene e ala i le taumafataga o le taeao sa alo atu i ai. Tatou te faafetaia pea le Atua i ana faamanuiaga. Ou te talitonu foi ua maua se faasiliga malosi e faaauau ai le tatou galuega.

E faataatiaese a tatou taualumaga mo le malologa i le taeao ua maea le saunoaga a le sui usufono mamalu mo Sagaga 4. Ia o lo o maua pea le avanoa mo se isi sui usufono e fia saunoa i le tatou Tulafono Tau Faaofi.

Ia, se i tulai mai le sui usufono mamalu mo Faleata 1.

Tofa MANULELEUA PALETASALA T. TOVALE (Faleata 1): Ia, faafetai i lau Afioga mo le avanoa ua maua foi e lenei sui usufono e avatu ai foi se motugaafa e tusa ai foi ma le Tulafono o lo o talanoaina i lenei taeao. E moni le saunoaga ua tali le sua i lenei taeao ua saoialo foi se faamalositino aua lau Afioga faapea foi le Afioga i le Tamaitai Palemia. E momoli le agaga faafetai i lau Afioga ma le Ofisa o le Fono mo tapenaga.

E faatalofa atu foi i lau Afioga i lenei taeao faapea foi le Afioga i le Tamaitai Palemia, aemaise le mamalu o sui usufono i lenei taeao i Minisita o le Kapeneta aemaise foi le la Itu o le Malu. E faatalofa atu foi i Ofisa Sili o Pulega ua tatou mafuta i lenei taeao. Malo le soifua manuia.

Ia, se i avatu foi se manatu e tusa ai foi ma le Tulafono ua talanoaina i lenei taeao i lou sui usufono. Sa ou usu ananei i le taeao i le matou Misasa foi lea masani i le vaveao, sa auga ai le Tusi Faitau a le Afioga ia Patele faapea mai; “Na ou sau e aumai le Tulafono ae ou te le i sau e talepe le Tulafono, na ou sau e faalelei le Tulafono.” Ia e pei la o lou tulai atu i lenei taeao e faauigaina o lau tulai atu, ou te le i sau ou te faatuiese i le Tulafono na ou sau e lagolago, ou te tulai atu e lagolago ma sapaia le Tulafono. Ae pau lava lea na o nai motugaafa foi mo le teuteuina o le Tulafono. O le tulaga o le Tulafono o lo o tatou talanoaina i lenei taeao, ia pei e foliga mai e tolu lava vaega.

O le vaega muamua o le tuuina mai le isi pito i le isi pito, aumaiga i o i le isi vaega i le isi vaega. Lona lua, o le sueina o le laisene o le tagata e faafoeina le taavale. Tolu, o le suega o le malosiaga o le taavale po o le a le ituaiga malosi la e i ai le taavale, le fitness o le taavale. E pei o vaega na e tolu o lea e agai i ai le tatou Tulafono i lenei taeao. E avatu ai foi la sau vaega e tusa ai foi mo le teuteuga atili o le Tulafono, i le tulaga lava lea i mea o e o lo o sue le laisene e fia maua se laisene e aveina ai le taavale.

E i ai se vaega ou te fia avatuina i le tulaga lea o le malosi o le tagata o lo o aveina le taavale. Ia e moni lava o lea ua i ai le tulaga i tausaga e maua ai le laisene avetaavale, a o le taimi foi la lea e i ai e tatau ona tilotilo foi i ai le Matagaluega i le tulaga foi lea o le tausaga o le matua o le avetaavale ua le toe aoga ai ona toe tago i le foepuni o le taavale. Aua tasi lena vaega o lea e tele ina tutupu ai faalavelave i luga o alatetele. Ia pei o se faataitaiga lea o le a ou tau avatua i lenei taeao, i le aso ananafi na ou usu atu ai ou te faatau i se faleoloa o le tasi o faleoloa i le matou pitonuu, e solomuli atu le taavale a le isi toeaina o le a liliu e alu, o la e la e tu e give way agai taavale la e omai i le alatele, a o la e foi e solomuli mai le taavale a le isi toeaina e sau e alu foi. E fiu la le toeaina lea i tua na muamua solomuli e faaee ee le pu o le taavale, a o la e lava e solomuli mai lava le taavale a le toeaina lea sau lava soa le pito i luma o le taavale a le toeaina lea e give way agai i o. Ia, o le mea la ua tupu, ua lavea le taavale a le toeaina lea a ua sau loa fai le talanoaga ae maua mai le tala, o le toeaina lea na soa le taavale e matua tutuli lava taliga ua le lagona se mea. O le mafuaaga lena na ala ai ona fiu le toeaina lea e faaee le pu ae le tu. Ia pe tasi lena vaega e fia maua ai foi se malamalamaaga aua e tatau foi ona toe review le tulaga o le matua o le soifua ua tatau ona faamuta ai ona toe tago i se taavale, aemaise o le soifua maloloina, aemaise lava le faalogo ma le vaai. Ia tasi lena vaega o lea ou te fia maua ai foi po o le a le tulaga, po o le a ituaiga gasegase ma le malosi o le gasegase ua i ai le tagata lea ma le matua ua tatau ai ona le toe aoga ona toe fealua i luga o le aualatele mo le saogalemu.

O le tulaga i taavale mo le suiga o le warrant of fitness o le taavale, e fia oo foi i ai se faamatalaga. E tele lava ina ou vaai i uta pe a ou alu atu e pasi lau taavale, e pei lava e matele le pasiga o le taavale e le au pasi taavale i le taofi o le taavale, o moli o le taavale, o pu o le taavale, o salutimu ma fusipau ma isi vaega, ae le i oo lava le suesuega a le inisinia lea e sue pepa o taavale i le loloto o le ituaiga malosi ma le ituaiga saogalemu ua i ai le taavale.

Ou te lagolagoina le finagalo o le Minisita pei ona saunoa i ai ananafi, le Minisita o le LTA, o lea ua i ai nei latou fetuunaiga ma nisi e atamamai i mea tau inisinia e tuuina atu ai le isi vaega lea o le pasiga o taavale, ona o lenei itu, e faapitoaugafa sau faamatalaga i mea o pasi ia laupapa laupasese. E pei lava ona outou silafia ma outou tagatagai i ai i mea o pasi, ia pei lava ona ou fai atu, na pau lava lena o mea o lea e sue ai le malosi o... ae le i oo le vaai a le inisinia i totonu po o le a le malosi o le tino o le pasi lea e i ai. Aua e

moni lava o lea e kava mai apa ma le manaia o le vali la e i ai ma le lelei o le afi o le pasi, a o le malosiaga o lo o i ai le pasi, e le o iloa atu i totonu po o le a le malosi o laupapa la i totonu. O le mea tonu lava lea o lea tou te silasila i ai pe a oo i le taimi e lavea ai le pasi, na ona lavea lava o le pasi alu ese atoa lava le fale ae tu mai lava na o le fola o le pasi ma pau o le pasi, ona o tulaga la na e le o iloa pe silafia e le pasi taavale po o le a le malosiaga lea e i totonu o laupapa ia e fau ai le pasi.

Pei na pau lena o se vaega o lea ou te fia tuu atu ai foi se lagona o lena foi sui usufono mamalu...

FOFOGA FETALAI: Malie le sui usufono se i tuu atu le avanoa i le Afioga i le Minisita o Galuega Tetele, le LTA.

Tofa Hon Olo Fiti Afoa Vaai: Faafetai tele i le Afioga i le Minisita Lagolago mo manatu faaalua. O le tulaga lea e i ai le tatou Tulafono i le taimi nei e pei ona ia taua le tulaga foi lea o le health o le tagata avetaavale, o lo o i ai le tatou Tulafono foi lea e 60 loa tausaga o se tagata e avatu pe faafou pe apalai atu se laisene, ia e manaomia uma la tulaga o lipoti faafomai i le tulaga lena. E faamaoi lau Afioga i le Fofoga Fetalai le mataupu lea ua tau ai le siakiina o taavale mo le laiseneina, o lea ua toe faafoi mai le vaega lea i le LTA, ma o lo o taoto i le polokalame a le LTA le toe faaleleia o ana facilities. E sao foi, a outou silasila foi i le mea la e pasi ai taavale, ia te au foi ia e le o talafeagai. O la e la ua i ai se tulaga o le faafouina o vaega ia, ona faia lea o le mea lea e atugalua i ai le sui usufono e sao, ina ia mautu ma atoatoa lelei le siakiina, aemaise lava la o pasi ma taavale laupasese laiti. Ma le faaaloalo.

FOFOGA FETALAI: Malo faafetai. Ia saunoa lau Afioga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai ma le faaaloalo ou te tulai atu ai ona o le mataupu lea e fia maua se faamalamalama. Sa taua le Tulafono lea a ausia loa le 60 tausaga ona aumai uma lea o lipoti o fomai ma tulaga faapea. A o lea e fesili atu faamolemole i lau Afioga i le Minisita, o le a foi le igoa o le Tulafono lea, ona ou te le o iloa e i ai se Tulafono faapena? Ma le faaaloalo.

Tofa Hon Olo Fiti Afoa Vaai: Lau Afioga o le Tulafono Faatonutonu. Faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o le igoa o le Tulafono lea ou te fia maua. Se i ou tago e sue i i le lisi ia ma Tulafono ia le... Ou te fia malamalama leaga o la e faafofoga mai le atunuu, aua o lea e tatau ona silafia mea ia. O le aoga ma le taua lena o tatou Fono.

FOFOGA FETALAI: O le taimi o le taimi o le sui usufono o Faleata 1, e le o talanoa mai le sui usufono o Faleata 1 i ni Tulafono.

Tofa Hon Laufo Fonotoe Nuafesili Pierre Laufo: Ia faafetai.

FOFOGA FETALAI: Tulai mai le sui usufono mo Faleata 1.

Tofa MANULELEUA PALETASALA T. TOVALE: E moni lau Afioga i le Fofoga Fetalai ua faalavelave tele sui usufono ia i lou taimi. Ae pei ua ala ona ou taua le tulaga lea i le soifua maloloina ma le matua ua tataua ona faamuta ai nai tagata ia ua matutua, aua o le mea lea e i ai, na ona expire lava o le laisene toe alu atu toe faafou, a o le isi mea lena e tataua ona tilotilo i ai le Ofisa, ina ia tataua ona vaai i le tagata la e alu atu po o le a le matua ma lana silasila la e i ai, ua tataua loa ona toe fai sana suega foi lea i le soifua maloloina.

Ia, o le tulaga foi e pei ona ou taua le malosia o le taavale, ia aua e moni ai le saunoaga a le Afioga i le Minisita, o lea ua amata ona tilotilo agai i o i mea o private sector foi ia i tagata ia e i ai le latou tomai faapitoa mo le pasiga o taavale e fesoasoani ai i le galuega lea. Aua o le tele lava o... o lau tilotilo i ai i le pasiga o taavale ia i atunuu mamao, e matuai siligi lava i luga le taavale ae matuai sue uma lalo o le taavale po o malosia uma lalo i le pito i lalo o le taavale, aemaise lava e i ai le mea lena e faamau i pau ae luelue ai foi lea pau, mea ia o port joints ma mea faapena. E pei o le mea lena ua ala ai ona avatu se lagona i le tulaga lea ina ia mautu equipments, mea e faaoga e le LTA ina ia maua lelei ai le malosia o le taavale la e i ai i le taimi lena.

Lau Afioga i le Fofoga Fetalai, e pei na pau lena o nai manatu ua ou talanoa atu ai i lenei itula e tusa ai foi ma le Tulafono ua tatou talanoaina i lenei taeao. Ae malo faafetai mo lou avanoa.

FOFOGA FETALAI: Faafetai. Malo, ia faafetai. Atonu o lea foi ua faafofoga mai le Afioga i le Minisita, o lea foi ua saunoa, o lea o le a silasila i ai le Pulega foi aua le agai i luma ona o faalavelave tutupu mai i lenei vaitaimi. Malo lava faafetai mo le sao taua.

Ia, o lea ua maitau atu o lea ua taunuu i fanua le lato i le tai ma le lato i le ea o le Afioga i le sui usufono mamalu mai Aleipata Itupa i Luga. Ia o lou avanoa lenei.

Afioga FUAAVA SULUIMALO AMATAGA (Aleipata Itupa i Luga): Ua faafetai i lau Afioga i le Fofoga Fetalai. E momoli atu foi le faafetai i lau Afioga aemaise foi o le Failautusi o le Fono ma le aufaigaluega e tusa ai foi ma le faamalositino i lenei taeao, o lea ua sao ai foi i alo le iputi o lenei taeao i le Afioga i le Palemia ma le Kapeneta aemaise foi le mamalu o le Palemene.

Ia o lenei itula e faafeiloai aloaia atu ai i lau Afioga i le Fofoga Fetalai aemaise foi o le Afioga i le Tamaitai Palemia ma le Afioga i le Sui Palemia ma le Vasega o Minisita o le Kapeneta aemaise foi o Minisita Lagolago.

Liliu mai i lenei itu i le Afioga i le Taitai o le Itu Agai aemaise foi o sui usufono mamalu o le Palemene ua tatou faatasi i lenei taeao. Ia o le viiga lava i le Atua o lea ua e saunoa i ai ma e taitai i le taeao e faateleina pea, aua o Lona finagalo ma Lona alofa o lea ua mafai ai ona tatou taupati ma tatou aulia fiafia lenei aso aua foi lo tatou valaauina e tusa ai foi ma mataupu i Tulafono ma tulaga uma pei ona i ai Tulafono o lo o lauliliuina nei e le Palemene i lenei taeao.

Lau Afioga ou te iloa o se avanoa foi lea e faaleo atu ai ni faamaisega i si ou itumalo aemaise lava i aiga o lo o faapena ona feagai ma faanoanoaga ona o le valaau paia a le Atua, i se tasi foi o auauna a le Atua po o le Tofa foi ia Taituave Manuia, aemaise foi le tina matua ia Pusi. O lea na maua nei i le taeao o lo o faapena ona falelauasi i lenei taeao. E talitonu o lea ua faapena ona po ai le nuu ma pau foi le masina ma mafuli le la i Malaefono ma Matautunaaai, e i ai le afioga i le Tuiatua na faanofonofo. Le Tofa i le matua ia Fuataga aemaise foi le falefia o alii, Amituanai ma i laua suafa, ae a tootoo ma le mamalu ia Saleaumua.

Lau Afioga o le tulai atu o lenei itumalo, ia faafogafoga maia si ou itumalo se i taumafai so tatou sao e tusa ai foi i le tatou Tulafono ua opea i le Maota. I le tulaga o le laiseneina o taavale e pei ona i ai i le Pulega o Felauaiga i le Eleele.

Lau Afioga e muamua, e i ai le lagona o lenei itumalo e lagolago i le fesuiaiga o le Tulafono lea ua aumai. Aua e pei lava ona maua, i tausaga ua mavae sa faapea foi ona fetuunai ma aumai i le Pulega o Felauaiga i le Eleele i le Matagaluega o Leoleo. E fua lava nei fesuiaiga i le manaomiaga. Aemaise o lenei talutalufou ma tulaga uma, ia e i ai lava le lou ma lona fuata. Pe afai ua talafeagai ona o nisi foi o mea ua tutupu mai, aemaise foi se lauliliuina o ni faaletonu i le faatinoina o le auaunaga, e pei o le tulaga lena e avatu ai pea le lagolago a lenei itumalo i le Tulafono.

Ae i ai nai vaega po o nai motugaafa pe o se faatauvaa foi a lenei sui usufono, e faataatia atu pea i lumamea i le afioga i le Minisita aemaise foi o le Pulega ma le Matagaluega, o lo o fitoitonu i le faatinoina ma le faamalasia foi o lenei Tulafono.

Lau Afioga o le tulaga lea o le see mai lea i le Matagaluega o Leoleo agai i le Pulega o Felauaiga i le Eleele, aua e talitonu foi ua talafeagai i lenei vaitaimi. E matauina foi ma le totoa ia le tele o taimi, aemaise lava le Matagaluega o Leoleo ua tele tele a latou matafaioi, o lo o taumafai lava, ona o le tele foi o nisi o vaega o lo o luluti mai i lenei taimi e pei ona taumafai i ai le Matagaluega, ona o latou ia e malu i ai le Malo, e pei ona faalupe ai faapena. O enforcers ia o Tulafono uma, aua e le tasi se Tulafono e faamalasia e leoleo. O Tulafono uma lava a lenei Palemene, e i ai tulaga ia

o le faamalosia e leoleo, ina ia faapea ona tau tata mai i le moa le filemu ma le saogalemu o si o tatou atunuu.

E i ai la le tulaga lea, aua e foliga mai o lea ua vaavaai atu foi i le Tulafono, o le admin ina po o le faatinoga, o le a faatino lava e le LTA, ae enforce foi e leoleo. Ae pe i ai lava le tagata ua faapena ona le usitaia le teuteuga lea o le Tulafono. Ae o le tulaga e pei ona vaavaai atu i ai, e tele lava nisi o Vaega e tatau ona agai i ai le Pulega o le LTA, ina ia faapea ona lagolagoina ia fesuaiga aemaise o le laiseneina o taavale ma le sailia o laisene o avetaavale. I le tulaga lea o le Infrastructure pe i ai se tulaga, ia fai lelei se tatou driving course e tau saili ai le tulaga o le suega o laisene. E i ai lou talitonuga i le taimi lenei, ua tele tele taavale iinei i Samoa. Aemaise lava aiga e i ai loa taavale, ua ou vaai i tamaiti e laiti toeitiiti lava faatoa 10 tausaga ae ua feoi i taavale. Ia u ai ai le tulaga lea, ua tuusaunua le feoi ai o alo ma fanau faapea, aemaise lava afioaga i tua. Ai faapea e le o mafai ona faamalosia ma enforce atu e leoleo.

Ae i ai le faaeteetega i le tulaga lea, aua e fai fai lava i auala foi ia e tau le oo atu ai galuega a alii mamalu o le Malo, ae i ai lava le taimi e oo mai i le taulaga i le mea o lo o pisi ai, ona tutupu ai lea o nisi o faalavelave. E manatu lenei usugafono, i le tulaga lea o le driving course, e mafai ona faatino ai. Ou te le o mautinoa i le taimi lenei, po o faaauau lava le tatou polokalame lea sa faatino, e le iloa po o le 15 i le 20 tausaga talu ai. A o pule ai i le vaega lea a le Traffic le afioga ia Tupuola Misi Tupuola. Sa faasavali uma ai i Matagaluega a le Malo ia le polokalame lea o le Defensing Driving, ma sa agai umai ai Matagaluega. I le taimi lea o ou galue i lalo o le Pulega o Suavai, sa agai uma lava i ai, fai le course ma fai suega ia, fai driving test ma mea uma faapena faatoa issue ai lea o lau Certificate. E tusa lava pe ua i ai lau laisene, a o laisene foi na sa base i luga o fuafuaga i na foi vaitaimi. O le taimi lenei e pei ona malie foi i nisi o saunaoga, ua tatau ona test ma le vaai aemaise foi o le faalogo.

Na saunua nisi o sui usufono o le tatou Maota, e i ai lava tulaga faapena, aemaise foi o po, a segaia mata po o fofoga foi o le isi avetaavale i moli, ia ua pei loa ua le iloa le tagata la e savali i autafa o le auala, ma faapea ona afaina. Aemaise o taavale solomuli, o la e faaee atu le pu ae ua logoa ma ua le lagona, ia faatoa tu lava i le faalogo atu ua le alu le taavale e i ai le mea la e taofi mai o la ua pao.

Ae pei o vaega uma ia o le defensing driving, i si ou tamai malamalama i le taimi lea o faatino e le afioga ia Tupuola, a o Pule Sili ai foi le afioga ia Leasi, ia o le manaia ia o lea polokalame. E te amata read ina le auala, at least 50 mita i le mea lea e i ai lau taavale. E faigofie ai ona e prepare i lau action, ae e te le i oo i o i le 50 mita. I le tulaga o mea ia, e pei o lea ua i ai le telefoni, ua i ai mea ua distract ai ma aveese ai le mafaufau e concentrate i le auala. Ae taua le tulaga lea, aemaise lava i latou ia o le a agai i luma i commercial licenses, po o laisene ia e oo atu ai i luga i avepasi, aveloli, ave

masini mamafa ma tulaga uma faapena. A o laisene mo taavale private, taavale a aiga taitoatasi, e tatau lava ona faaauau le tatou polokalame lea mo le aoaoina aemaise o taimi e fai ai course ia, aua e le gata ina faitau le Tulafono, ae ia malamalama.

Ou te le o iloa po o gafatia e le lotoa a le Pulega a le LTA i Vaitele e fai ai nai course foi lele, e ao ai le ave o le solomuli, o mea uma faapena, pe a faaauau tulaga ia. O le agaga lava ia faaitiitia faalavelave faafuasei e tulai mai, aemaise ia malu puipuia le soifua ma le ola i le mamalu o le atunuu, o lo o faapea ona faaogaina taavale ma feoai i luga o auala televavave.

FOFOGA FETALAI: Ia malie le sui usufono mamalu, se i tuu atu le avanoa i le Minisita o Galuega.

Tofa Hon Olo Fiti Afoa Vaai: E faafetai i le sui mamalu, masalo ai ua leva e le o toe agai atu le sui usufono i le nofoaga i Vaitele o lo o faatino ai le vaega lenei. Ma a afio atu lau afioga o la ua i ai uma lava le vaega lena e pei ona e taua, o lea e aoao ai le tulaga lena, o le faasolomuli, o le tele ia o tatou cone mumu la e i ai i o i tua ifo o le tatou Ofisa, la ua faatino ai le vaega lena. O tatou pasi ma tulaga na, o la e faaoga le aega la e i tafatafa o le maota o Laauli. O lea foi la e masani ona agai ifo Laauli, ma tilotilo foi po o lelei le o a pasi i luga ma le omai i lalo, ia o le tulaga lena o lo o i ai. Faafetai.

Afioga FUAAVA SULUIMALO AMATAGA: Ia faafetai, faafetai i le afioga i le Minisita pe afai o lea ua i ai tulaga ia. Ia atonu se i oo foi i le taimi e faafou ai le laisene o lau taavale ona ou oo atu lea se i asiasi ma matamata ai, ma toe matamata foi i le aega lea po o lava le tu a le aega ae le toe tau faatu laititi, aua e tele lava ina ae i le lima ia le tele o taavale i le mea lena e i ai. Ia faafetai mo le fesoasoani mai. O le tulaga e pei ona avatu ai, o le laiseneina o taavale, o le warrant of fitness. E i ai lava mea e tele ina ou vaai e tutupu ai isi faalavelave, e lavea ane le taavale e ese le numer plate la e alu ai. E tusa o le ituaiga mea foi lele, o le taavale o la ua fit, o la ua issue i ai le number plate ma le sticker, ae oo loa ina fealuai le pomu foi lele, tatala mai loa le number plate e alu e tope ai feau, ae a lavea mai loa...se i mataitu ane po o le a se mea e faaitiitia ai lea tulaga. E i ai lava taavale e faapena, e tau lava o se mea tau ina pasese ai luga o le aualatele, atonu o se mea foi e mataitu i poloka ma sailiga a malu o le Malo ma faaitiitia ai tulaga ia.

Ae o mea o la e tutupu, e pei foi ona saunoa, nisi o sui usufono, e pei foi ona saunoa nisi o sui usufono, ta te tau alo i tua ma le auala ua lautetele mai o pau, aemaise foi le tulaga o sipika foi ia, a tu nei se taavale faapena, e faalogoina le galulu o le taavale, ta te ofo foi i le tagata la e i totonu, e oo lava i la ta taavale pe 5 mita i luga atu, ta te faalogo e galulu atoa. Ae le o i ai se tulaga e ono afaina ai, ae o se mea e tatau ona mataitu ma faaleleia foi

nai Tulafono faatonutonu, e limataitaiina ai tulaga faapea. Ina ne i te i ua oso atu i tafatafa o se taavale a se toeaina po o se loomatua, oso ai se mai fatu ma tulaga uma faapena ona o le leo tetele o laau ia.

O le isi tulaga faamolemole, atonu e le o aafia i lalo o le Tulafono ae na o se mea e tauala atu ai se tuualalo a lenei itumalo, ia tatou auala. O lea ua taua e nisi o sui o le Maota nei, ia tatou faapatupatu ia e pei ona i ai. Ia tietie mai nei le vaveao, ma omai faatasi ma le afioga i le sui Palemia, ua ta vaai foi lava, manaia lava le tatou auala. Ua feololo foi nai patupatu la e i ai. Ae na o se tulaga ua ta matauina lava le agai i le malaevaalele, ua le toe afa le mea o le alu e tulituli le taimi o le vaa, aemaise o le vaa i le alu i Savaii. Ia taatia atu pea i ina, semeamanu ua maua le avanoa, e pe i ai nai teuteuga o le tatou auala fou la manaia le molemole ma tulaga o i ai, aemaise lava e pei ona taua nisi o pasi, e tutu lava i le moa o le auala. O la foi ua uma ona assign ia bus stop ma mea faapena. Ae tatau ona i ai ni a tatou passing lane foi lea. E i ai nai avetaavale ua matutua, e le mafai e i latou ona o o i luga i le faatapulaa lea e i ai e tolotolo lava a latou taavale. E te fiu e sue se avanoa e pasi ai, ona o la foi e pisi mai isi laina. Ae manaia lea vaimea lea e i ai Toamua, Puipaa nai saoga faapena, e fai siga passing lane, e mafai ai ona tuutiitia nai avetaavale ia. Aua o lea ou te le mataua foi, po o le a Tulafono e molia ai foi le tagata pe a le move tele. Pe fia ia kilomita i le itula pe a e tolotolo i le auala ae ese ai foi le molia pe ova tele foi le saosaoa.

Pei o nai tulaga ia e avatu ai i ina, i lumamea nai motugaafa ia a lenei itumalo, aua le lauliliuina o le tatou Tulafono, aemaise foi o le faamuamua o le saogalemu o le mamalu o le atunuu, aemaise foi o i latou o lo o faaogaina ia taavale i luga o aualatetele. Ma le faaaloalo lau afioga faafetai.

FOFOGA FETALAI: Malo saunoa i lau afioga i le sui mamalu. I matau lava ia a le Nofoa, e tagatasi lava saunoaga ma ...e pei o le agaga lena o le Nofoa, e talitonu foi ua lauliliuina lenei Tulafono i le tele foi o saunoaga a sui mamalu e lava ta oso ai foi le tatou Tulafono tau faaofi.

O le mea lea ua maea saunoaga a sui mamalu, e tapa lau afioga i le Minisita e faamalamalama ai foi nisi o itu, na lagalaga i finagalo o sui usufono mamalu.

Afioga Hon FAUALO HARRY JEFFREY SCHUSTER: Faafetai tele lava i lau Afioga i le Fofoga Fetalai mo le avanoa, e tali atu ai foi i fesili ma faamalamalamaga o mataupu na laga e sui usufono mamalu. E momoli atu le faafetai tele lava i sui usufono mamalu uma na saunoa i le Tulafono, ua faaalua foi manatu i le tulaga o le faaleleia atili o le Tulafono i le faaogaina o le aualataavale ma le laiseneina o taavale. I lau maitau i manatu uma na faaalua, e lua vaega o lea e lilifa agai i ai manatu.

O le vaega muamua, o le saogalemu. Saogalemu o femalagaaiga i luga o le auala mo taavale, saogalemu o taavale, saogalemu i le laiseneina o

avetaavale ia malamalama i le Tulafono ae faapea foi le saogalemu mo e o lo o faaaogaina foi le auala e savavali ai i le aualatele a le Malo, aemaise lava le tulaga foi i fanau aoga.

O le tulaga lona lua, o le faamalosiiina o le Tulafono, ia faamalosiiina le Tulafono, aemaise lava le vaega o lo o taua e le sui usufono mamalu, mo taavale ia e i ai tulaga e le o faatagaina i le Tulafono, o moli faaopoopo, o pu leotetele, o musika ma malosii le musika, ua leotele tele le musika i luga o le speaker o lo o faaaogaina e taavale ia.

I le agaga pei ona faamalamalama atu o le Tulafono lava ia o le faagaioiina o le laiseneina o taavale ma avetaavale, o le a taatia atu i le Matagaluega o le LTA ona o latou e nafa tonu lava ma le tulaga lea, a o le faamalosiiina la o le Tulafono, e faamalosia e le Matagaluega o Leoleo. E pei la ona laga mai e sui usufono mamalu, amata mai le Afioga i le Taitai o le Itu Agai, e tele foi ni mataupu na ia laga e aofia ai le toe tilotilo i suega, ma aoga i suega mo e o lo o o atu e talosaga mo le laisene e avetaavale ai, ina ia malamalama lelei le tagata o lo o alu atu e aumai le laisene i le tulaga e tatau ona i ai ma le maualuga e tatau ona i ai, ia saogalemu i luga o le auala. Ia o lea sa taua e le Afioga i le Minisita o lo o i ai fuafuaga a le Matagaluega e toe tilotilo i le tulaga lea i le suiga o le tulaga i le suega mo e e o atu e talosaga muamua mo le latou laisene. Na laga foi le tulaga lea i le tagai i le iloilo ina mo taavale pe a o atu e toe talosaga atu i laisene ina ia saogalemu, ia lelei atoatoa le taavale ia leai se tulaga e faaletonu le taavale aemaise lava taavale ia e faaaogaina e feoai ai le mamalu o le atunuu ia pasi, ia saogalemu pasi ia, e le lamatia ai le soifua o le atunuu.

Sa laga foi le tulaga lea i taavale ia e i ai moli. O le a faataatiaese la le tulaga lea i le faamalosia o le Tulafono ae o le a muamua le faamatalaga i le tulaga lea i le laiseneina o taavale. O se tasi o tulaga taua lea na laga i le saunoaga a le Taitai o le Itu Agai, o le resitala lea o taavale, ae i ai ma le resitala lea e faaaoga i le MCIL e resitala ai aitalafu foi ia o la e faamau i luga o taavale. E faamaonia le tulaga lea na laga e le Afioga i le Taitai o le Itu Agai, ona e tatau ona tutusa le sao o le resitala lea i le LTA mo aitalafu, e tai pei o le resitala lea e faaaoga mo fanua. A e alu e faatau sou fanua saoloto, e te alu atu e mau uma lava aitalafu la e i luga o le fanua lona. E tatau la ona agai foi le resitala lona i le resitala lea o taavale, a alu atu le tagata lea e faatau le taavale o la e na te iloa o la e i ai le aitalafu i luga o le taavale ona ia iloa lea e faaletonu e le mafai ona faatau le taavale seiloga e totogi atoa le aitalafu lea o lo o faatau mai ai le taavale. E pei o le isi foi la tulaga lea e aiga ma le tulaga sa laga foi e le sui usufono mai Vaimauga 2 i le taimi foi lea e te faatau le taavale, e oo lava i le tulaga lea. A e mautinoa i luga o le resitala o taavale le aitalafu, e te iloa foi la le tuutuuga la e i ai. Ae taua foi le faamanino o le taimi lea. O le tagata lea e te aumaia ai le taavale, o le tagata lona e ona le taavale. Ae le o le faatau e oe le taavale e

ese le tagata la e resitala ai, ese le tagata lea e te avea i ai le tupe, ona e lavea lea i le tulaga lea, e le aoga le taavale lea mo oe.

Ua faamauina foi le fautuaga e tagai i le Komiti lea e faatuina mo le vaai i le saogalemu o femalagaaiga i se sui o le FESA ma se sui foi o le asosi o avetaavale o lo o i ai, ia i ai latou i luga o le Komiti lea, aua e taua foi le latou vaai i le saogalemu.

Na laga foi e le tele o sui usufono le tulaga e tatau ona manino faailoilo i luga o le auala, e iloa lelei ai e avetaavale tulaga foi ia o patupatu lea e i luga o auala. Ua maitauina foi le tulaga o moli i le auala lea e i Fogaa i Faleula, e le o malamalama lelei moli i ina. Ma o le tulaga foi i le faiga o tamai motu lena e i ai, pei e tau tifa laitiiti i uta le auala i le itu lena. Ua faamauina le tulaga lea.

Ua maitauina foi le tele o saunoaga na agai i le tele o taavale i totonu o le tatou atunuu. Ia, o le mea lena tatou te oo lava i ai ona o le saolotoga lava o tatou a maua lava le tupe a le tagata faatau lana taavale. Ia ma o se mea foi e mafai ona tilotilo i ai tatou po o le a le tulaga e mafai ai ona fai se tulaga foi lea e faaitiitia le aofai o taavale e aumai totonu o le atunuu. O le atunuu o Sigapoa e i ai le mea lea e lilifa Sigapoa ia o tagata e faaaoga pasi ma train. O le Tulafono la a Sigapoa a o le i faataua lau taavale, e te apalai mo le laisene e faatau ai lau taavale, a o le laisene lena e le taugofie, e taugata le laisene. Ia o se tasi lena o auala e mafai ona tilotilo i ai pe a faapea tatou te mananao e faaitiitia le aofai o taavale e aumai totonu o le atunuu ona e faigata foi lea o tatou o le atunuu saoloto, a maua lava lau tupe faatau lau taavale. Ia a o le saolotoga foi la lea e maua ai foi nai tulaga ia ua tumu tele taavale i totonu o le atunuu.

O le tasi foi la tulaga lea na lilifa i ai saunoaga a sui usufono, o le tele o taimi foi ia o taavale ua pisi ua tumu le auala, e i ai foi la le tulaga lea i taavale ia e alualu lemu i luga o le auala ua poloka uma ai lava taavale i so o se taimi lava o le aso. Ia o se tasi auala e mafai ona tilotilo i ai pe le mafai ona siisii laitiiti i luga le saosasoa foi lea, e le mafai, pei o se faataitaiga a faapea e te alu i le malae vaalele pe te alu i le auala lea cross island road, e le mafai ona lalo ifo le saosasoa e te alu i le 30 maila i le itula po o le 35 maila i le itula. O lo o faatapulaa e tatou le limit foi lea e le mafai ona sili atu ae leai se mea i lalo ifo. Ae i ai atunuu o le lalolagi e le mafai ona e alu i luga o le motor way ae lalo ifo o le speed e tatau on ai ai. E tasi lea tulaga e tagai i ai.

O le isi tulaga sa agai i ai saunoaga a sui usufono o le tulaga foi lea i mea o levies, e i ai le levy lea e tilotilo foi lea i le mamafa o taavale. Ia, o le tulaga lava ia i le faatulagaina o le totogiina mo le laisene, o le malosiaga lava o lo o i ai i totonu o le Tulafono i le Tulafono i le Pulega. A o lea tatou te tilotilo foi lea i le tulaga i le faatupeina o auala pe faapefea ona faatupe. Ia o le isi la lea e auala e faatupe ai o le totogi o le laisene i totonu o le laisene e i ai ma le levy mo le auala. A faapea la e le faia faapea, o le isi la auala e i ai

lona uiga e loan lava la le tupe e aumai e fai ai le auala. Ia, i si ou vaivaiga ia a tilotilo i ai, a faapea o le loan lona uiga o le a lavea e tologi faiauala le tagata foi lea e leai se taavale, ae a faapea o le laiseneina o taavale o i ina e sau ai le tupe e fai ai le auala, ia o lea la e pau tonu lava le mamafa o le avega i le tagata e fai le taavale ma e o la e faaaogaina le auala. Ia pei o se tasi lena o vaaiga i le tulaga lea i le levy lea e faaoga nei e faatupe ai auala mo i tatou.

FOFOGA FETALAI: Malie lau Afioga i le Minisita se i tuu atu le avanoa i le Afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai ou te tulai atu ma le faaaloalo, o lea ua saunoa tonu lava le Afioga i le Minisita i se mataupu taua a o se mataupu foi sa ou laga. O lea la ua manino i le faalogologo atu, e pei o lea na aumai le faataitaiga foi lea i le atunuu lea o Sigapoa. O Sigapoa la e laitiiti pei o le motu pei foi o tatou. E apalai muamua lau laisene e taugata ona faatoa faatau ai lea o lau taavale aua longa uiga o le laisene e faatau ai lau taavale. O lea foi la e i ai ma le lafoga lea o le faaaogaina o le auala. Ia, o tupe la ia o le a aumai nei, pe a pasia le tatou Tulafono, ia ona sii loa lea o laisene o taavale, sii ma lafoga foi nei o suauu, ia ma lafoga la ia a tagata e faaaogaina le auala, a leai, ia o le loan la le mea e tua i ai. O lona uiga la, o lea ua tatou sauni nei ma vaavaai i siitaga uma o mea nei o le a tatou vaavaai i ai, sii i luga lafoga, sii i luga laisene o taavale, ia e faaleleia ai tatou auala.

O le tali la ma lau vaai manino, ua leai se tupe, aua e mafua ona fai mea ia o le sailiga o se tupe e fai ai. Ua leai la ma se tupe o i ai. O lau la lea vaai manino i le mataupu lena pei ona ou talanoa ai i le aso ananafi. Ae faafetai i lau Afioga i le Minisita ia o lea la ua manino. Ua malie foi le fesili, ua malie foi le tulaga sa ou fia maua. Faafetai. Ia manuia le Fono.

FOFOGA FETALAI: Se i faamanino mai lau saunoaga lau Afioga i le Minisita.

Afioga Hon FAUALO HARRY JEFFREY SCHUSTER: Lau Afioga i le Fofoga Fetalai, e leai e le sao lea tulaga ua leai se tupe. O lena e tou te tagai i le Tala o le Tupe lena e avatu, e leai se aitalafu ua fai e tologi ai se isi aitalafu, o le tupe maua lava a le Malo la e tologi ai. O le mea lea e avatu i le Tulafono lea, o le malosiaga e mafai ai ona fai ae le faapea e avatu le malosiaga e mafai ai ona fai ona faapea lea o le a fai taeao. E leai o le mea lava tatou te tagai i ai po o fea e agai i ai ae le o faapea ua avatu nei ua fai loa nei lau Afioga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o le mea e faafetai ai, o lea o le a fai, o le a i ai le malosiaga e fai ai, fai loa. Faafetai.

FOFOGA FETALAI: E i ai le manatu, atonu o le taua foi lea aua o lea foi sa lagalaga e lau Afioga i le Taitai o le Itu Agai i au saunoaga, a o lea lava pei ona faamanino atu e le Nofoa, o le Tulafono tuai lava lea e i ai le tulaga lea, a o lea e le i faia.

Afioga Hon FAUALO HARRY JEFFREY SCHUSTER: E sao lelei lava lau Afioga. Ma o le mea foi lea i le totogiina o mea faapea, o le mea lava e tasi lea e fai o lou alu e laisene lau taavale, lea e maua mai ai le tupe lea e faagaioi ai le faiga o auala. E \$15 miliona le tupe sa tulituli e maua mai le laiseneina o taavale i le taimi lenei, e ova atu i le \$15 miliona le tupe lea e maua mo le tausaga, e sili atu i lo le \$15 miliona. Ae le o i ai se tulaga foi lea i se fuafuaga faapea i le faaofiina o le Tulafono lea pei lava o isi i le totogiina o laisene lea e faapea o le a sii faasoloatoa tau. E leai se tulaga faapena po o se fuafuaga faapena lau Afioga i le taimi nei.

Ae lau Afioga, e aiga foi la le mea lea, lea e laga e le sui usufono le taua tele o le mea lea e feoi tatou taavale, e i ai le tagata o tatou e mafai ona e totogia le leaga o le taavale a le isi tagata, ae i ai foi le tagata e sese e sau soa lau taavale, e matua leai lava se auala e mafai ona fai ai lau taavale. A e alu foi e ave e sue i le faamasinoga, e maumau le taimi. E totogi lau loia e uma ifo e leai se tupe a le tagata lea e totogi ai lau taavale. Ae o le tulaga foi lea a faapea e tilotilo pei ona laga e le sui usufono mamalu po o le a se auala i le mea lea. E le o se mea la e fai atu mo le taimi nei, a o se mea tatou te mafaufau i ai. Pe le fai le mea foi lea a totogi lau laisene e i ai i totonu o lau laisene se vaega o le insurance. O le insurance lena po o ai lava le taavale e te soa, e sau i le tupe lena le tupe e fai ai le taavale, ona le tupu lea o le mea lea i le tigaina o le tagata. Aua o le mea la lena e faatino e Niu Sila, o taimi uma lava e laisene ai lau taavale, e i ai le vaega o le laisene e i ai ma le part o le insurance. E i ai foi le isi tulaga o la e foi e fai i Niu Sila, a e alu e totogi lau... e avea oe ma member foi lea o le AA o le faalapotopotoga o tagata e ona taavale, e i ai foi la le tupe e totogi i ina pe lavea lau taavale pe lavea se isi taavale ia oe e maua uma mai lava i ina tupe e fai ai taavale. Ae pei ona saunoa sui usufono, o se tasi lea o tulaga o lea e i ai tatou iinei o lea e lavevea taavale ae leai se tupe a le isi tagata e fai ai le taavale. Ma o le tulaga la lena i le faasee atu o le...

O le tasi tulaga foi sa laga, foi lea ia manino tiute o le LTA ma leoleo. O le tulaga lea na faamanino ai lava i leoleo le taofia o le faamalosiga o le Tulafono, ona o leoleo e i ai le malosiaga e loka ai le tagata pe a faapea e le usitai i se faatonuga po o se mea e fai atu ai se alii po o se tamaitai leoleo. E le mafai la ona i ai se malosiaga faapea i le LTA...